



Dia ol rita bilong Wantok Niuspepa, klostu nau bai yu ken salim o teksim ol Tingting na Wari bilong yu i kam long *Wantok Niuspepa*...Sambai na redi tasol..



Populesen salensim divelopmen: PM

I go moa long pes 2
Stanley Nondol i raitim

PRAIM Minista Peter O'Neill i tok bisnis long kantri i gor na mekim planti winmani tasol long wankain taim, populesen long siti na taun i groa go antap tru na

givim bikpela salens long gavman long i stretim infrastraksa we ol pipel i ken kisim servis. Mista O'Neill i tok ikonomi bilong kantri i groa na gavman bai putim

bikpela milien kina moa long stretim ol infrastraksa divelopmen long ples we i gat bikpela populesen. Mista O'Neill i tok ol pipel i ken go long taun na siti long mekim bisnis

na ken raun long kainkain wok bilong ol. Gavman i nonap stopim. Em I tok wok bilong gavman em long stretim servis long taun na siti long ol pipel ken amamas.



OL pipel bilong Isten Hailans iamamas na welkamim Praim Minista, Peter O'Neill, i kamap long provins bilong ol na stap insait long namba 6 Nesenel Prea na Kavanen De long dispela wik Mande. Gavana Julie Soso na ol narapela Palamen Minista na memba i wokabaut wantaim em long go opim dispela bikpela prea bung long Goroka Taun we olgeta hap bilong kantri i bin luksave long en wantaim ol prea bung. Lukim moa stori long dispela long Pes 2, 8 na 11. *Poto: Sape Metta*

MI SAVE TOKTOK OLGETA DEI

Permi tasol 59 time long wintim want insait long first 3 months na kiam narapela 17 minits PER. Revider "talk" igit to 1000 nau.

EVERYDAY TALKER

59t PER MINUTE



Digicel

3G DIGICELPNG.COM

Toksave!

Word Publishing Opis bai pas long Fraide Ogas 30. Mipela bai stap long wanpela Inhaus Woksop. Sori tru long dispela! Opis bai op gen long Mande.

Painim CASH MONI bilong yu insait long KEN

"Painim CASH MONI insait long GLOBE na SITA Corned Beef or Mackerel ken"

Na kamap Wanpela LAKI WINA NAU!

Sapos yu painim displa ol CASH Moni:

- K1,000
- K500
- K100
- K50
- K10

"Aninit insait long ken" Go kisim CASH MONI bilong yu long Globe dealer or kolim **Globe Hotline 422 3966**

HARIAP!!!
Baim ol GLOBE na SITA ken mit or MACKEREL ken bilong yu NAU



Promosen bai pias long 31st December 2013

Telipa kiamas long PNG

Ol Sios i gat wok long givim stia

OL SIOS long dispela kantri i gat wok long givim spirituel stia na tu, wok wantaim gavman long kisim ol sevis i go long pipel.

Na ol sios i gutpela patna bilong gavman long kamapim ol wok developmen na kisim helt, edukesen, sosel na spirituel sevis i go long ol pipel, Praim Minista, Peter O'Neill i bin tok olsem long namba 6 Nesenel Kavanen na Prea De selebrensen we samting olsem 10,000 pipel i bin stap long en long Goroka.

Mista O'Neill wantaim 4-pela kabinet minista na 12-pela Palamen memba i bin go long Goroka bihainim askim bilong Isten Hailans Gavana, Julie Soso.

Soso i bin askim praim minista longgo pas long dispela bikpela de kantri i luksave long Bikpela.

Em i tok wantaim stia bilong Bikpela, gavman i wok long kamapim sampela gutpela samting olsem fri edukesen na helt

sevis, kamapim gut lo na oda ol infrastraksa olsem ol rot, bris na ples balus.

Tasol em i tok long 40 krismas i go pinis, PNG i no bin manesim gut ol mani na risos samting long kamapim gutpela developmen.

Tasol long 40 yia i kam, "yumi mas senis na kontribut gut long developim kantri, na tu, kisim ol sevis i go long ol pipel insait long ol rurel eria".

Hetbisop bilong Luteran Sios long PNG, Reveren Giegere Wenge i bin tok Bikpela i givim planti blesing long PNG, tasol kantri i gat hevi long hap bilong manesmen.

Long wankain taim tu, Mista O'Neill na Misis Soso i bin tok promis long wan wan long ol bai givim K1 milien long sanapim spesel Tabenakel we pipel i ken beten long en.

Kos bilong sanapim dispela Tabwnakel em K2 milien.

Long ol narapela hap bilong kantri, ol Kristen i bin

putim han wantaim na pre long gavman na ol narapela lida i givim gutpela stia long kantri, daunim ol lo na oda hevi, pasin bilong bagarapim ol meri, ol lida i givim gutpela gavanens na lukautim gut mani em kantri i kisim long ol risos.

Tasol long taim kantri i selebretim dispela Kavanen De, long Mosbi i bin gat 5-pela pipel i dai long wiken na pasin bilong repim wanpela meri i kamap.

Wanpela long lolol lain i dai em olpela Palamen memba bilong Simbu husat i bin wanpela gavman minista tu.

Dispela pasin i soim olsem yumi gat bikpela wok long senisim pasin nogut na strongim pasin bilong rispek, luksave long narapela, daunim pasin bilong belhat na bihainim ol toktok na pasin we ol pipel long Kristen kantri i mas mekim.



Praim Minista Peter O'Neill (namel), Helt Minista Michael Malabag (rait) na NCD gavana Powes Pakop i brukim graun long makim K54 milien NCDC het opis. *Poto: Nicky Bernard*

K54m bilong NCDC nupela het opis

Stanley Nondol i raitim

GAVMAN i givim K54 milien kontrak long kampani bilong kantri Sainaol i kolim Chinese Railway Engineering CONSTRUCTIONS (PNG limited) long sanapim nupela het opis bilong NCDC long Pot Mosbi.

Praim Minista Peter O'Neill i brukim graun long makim dispela projek.

Em i tok gavman bai putim moa mani long developim Pot Mosbi long kamap wanpela model siti long pasifik.

Mista O'Neill i tok gavman givim pinis K200 milien long siti rot na bai givim narapela K500 milien insait long 2014 na 2015 bast.

Mista O'Neill i tok bikpela developmen bai kamap long Mosbi siti long long mekim em bai kamap bikpela siti long rijen.

Gavana Powes Pakop i tok NCDC i hat wok tru long kamapim dispela bilding na em i karim kaikai bihain long 6 pela yia.

Mista Pakop i tok dispela bai kisim ples bilong olpela opis we ol NCD Kaunsil i bin sanapim long planti yia go pinis.

Praim Minista O'Neill i tok gavman save lusim K200 milien long wan wan yia long rentim opis spes bilong ol arapela bisnis.

Em i tok gavman bai stat long mekim plani bilding bilong em yet we bai stap longpela taim na ol i nonap lusim mani long rent.

Mista Pakop i tok Mosbi

em i bikpela siti bilong Papua Niugini na gavman putim K700 milien long rot developmen long NCD na narapela K800 milien long ol infrastraksa bilong Pasifik Gems long 2015.

Praim Minista i tok insait long tripela yia gavman tok klia pinis long K700 milien long stretim rot long Mosbi siti na K200 milien gavman givim pinis.

Narapela K200 milien bai gavman givim neks yia, na narapela K300milien long 2015.

Mista O'Neill tok klia olsem K100 milien bilong siti rot stap long baset na gavman i givim pinis. Em tok gavman bai putim K500 milien go insait long baste insait long tripela yia.

NIUGINI Ailans rijen na Sauten rijen i pinisim olgeta LLG ileksen na salim ol rit i go bek long ilektorel Komisen hetkwata long Mosbi.

Galp na Westen Provins i salim bek rit bilong ol long Tunde long dispela wik wantaim bilong Motu-Koita Asembli na dispela i pinisim olgeta wok bilong Sauten Rijan.

Momase rijen na Hailans rijen i wok yet long ol LLG ileksen. Long Momase, Morobe Provins i salim bek ol rit long las wik na Sandaun i salim bek long Tunde moning.

Madang tasol i no

pinis yet wantaim olgeta ileksen wok na i luk olsem ol bai surukim taim liklik moa bilong tripela LLG i pinis long kauntim. Tripela LLG em Josephstaal, Middle Ramu na Raikos LLG na Niyudo LLG long Raikos Distrik.

Long Hailans Rijan, Westen Hailans i namba wan long salim bek ol rit bilong 4-pela LLG em Elektorel Komisina i no bin stopim.

Sauten Hailans, Enga, Simbu, isten Hailans na Jiwaka provins bai salim ol rit bilong ol kam bek pas-taim long taim bilong

rit i pas long 30 Ogas.

Hela bai nidim 10-pela de de moa long pinisim skrutini bilong ol balot na Elektorel Komisen bai toksave long Minista bilong em long dispela.

Elektorel Komisina, Andrew Trawen i givim luksave long Sandaun, Galp, Westen provins long pinisim gut ol ileksen bilong ol winim taim bilong pinis 30 Ogas.

"Long planti yia, Sandaun, Galp na Westen provins i save kisim taim long karim aut ol ileksen bilong ol long wanem ol hap bilong ol i no gat gutpela

rot na no gat planti man long mekim wok, tasol nau ol i mekim gutpela wok stret," em i tok.

Mista Trawen i tok tenkyu long ol provin-sel edministreta wantaim ol eleksen opisa na ol pipel long bosim gut ileksen na long givim mani, trenspot na ol wokman meri long mekim wok.

"Klostu olgeta provin-sel edministreta i luksave olsem serim wok tasol i helpim 2013 ileksen bihainim ol agrimen (MOA) ol i sainim na dispela em rot yumi mas bihainim long ol ileksen long kantri bihaintaim," Mista Trawen i tok.

Populesen salensim developmen: PM

I kam long pes 1...

Mista O'Neill aste i mekim dispela tokotk long Mosbi. Em i tok moa pipel nau i wok long go long taun na siti na dispela i putim bikpela hevi long gavman long stretim planti sevis.

Mista O'Neill i tok ol pipel long Papuan Niugini i gat rait long muv i go long taun na siti. Na em wok bilong gavman long stretim ol besik sevis olsem gutpela rot, helt, wara

saplai na loa na oda long mekim laip bilong ol isi.

Praim Minista O'Neill i mekim dispela toktok long graun breking seremoni bilong nupela K54 milian siti hol bilding bilong NCDC long Mosbi.

Mista O'Neill i tok bisnis long PNG i groa go antap na winim arapela Pasifik kantris.

Mista O'Neill i tok bikpela populesen bilong taun na siti stap long

ol setElmen we nogat gutpela wara, pawa, haus na wokman nogat inap mani long baim rent.

Em i tok gavman i luksave long dispela na tok bikpela developmen i stat long kamap nau long stretim ol dispela hevi long helpim sidaun bilong ol.

Long wankain taim gavana bilong NCD, Powes Parkop i tok populesen bilong Pot Mosbi siti i winim moa long 1 milien.

Gavana Pakop tok gavman i luk-luk long tanim planti setelmen long siti i kamap sabeb na givim taitol long ol pipel.

Mista Pakop tok em bin toksave pinis long Lens dipatmen long makim graun long 8 mail long givim taitol long ol pipel ken mekim gutpela haus na kisim gutpela sevis bilong rot, wara na pawa.

Mista O'Neill i tok populesen long

Mosib, Lae, Hagen na Kokopo i groa bikpela. Em tok gavman bai apim mani long developim ol dispela siti na taun go bikpela.

Mista O'Neill i tok gavman bai putim mani tu ol arapela taun long kantri long mekim go bikpela.

Long wankain taim Praim Minista i tok gavman long namba wan taim tru i givim bikpela milien kina long mekim wok developmen.

Ol yut i luksave long Wol Yut De

LAINIM gutpela pasin long ol yangpela, em i bikpela toktok bilong Wol Yut De, i bin kamap long Ogas 12.

I bin gat olsem 50 lain i kam bung long Kumul Rum bilong Holide Inn long Fraide, 16 Ogas long tingim Wol Yut De. Ol sumatin bilong Jubilee Sekenderi Skul, Pot Mosbi Nesanel Haiskul na Gordons Sekenderi i kamap wantaim ol narapela yangpela memba bilong Yut Adolesens Helt klab.

Wanpela yangpela meri bilong Paradais Haiskul, Talitha Siraba, i bin autim wanpela toktok i autim hevi bilong Vailens Egens Wimen na gels. Talitha Siraba em i wanpela smatpela meri i stap long gret 10 long Paradais Hai Skul, na long las yia em i bin kamap namba tu ples long resis bilong autim toktok, bikos spis bilong em i bin toktok long hevi bilong vailens egens wimen na gels.

"Yumi i no wok long mekim samting tru long stopim dispela pasin nogut bilong vailens egens wimen long PNG. PNG meri i save kisim bikpela hevi na kaikai bagarap long han bilong ol man long PNG. Pret i save rausim rait bilong ol yangpela na bikpela meri long raun fri insait long komyuniti," Mis Siraba i tok.

Pasin bilong vailens i save kisim olgeta, tasol planti taim ol man i save kamapim moa bagarap long ol meri.

Yang Wimen Kristen Asosiesen (YWCA) I wok bung wantaim Yunaitet Nesens na Yut Adolesens Helt (YAH) i bin redim dispela kibung.

Minista bilong Komyuniti Developmen, Loujaya Toni, Ekting Komisina bilong Yut, Norit Luio, ol hetmeri bilong YWCA, PEAN, Yut, Meri na Sios wantaim Komisina bilong Yut, na ol opisa bilong UNICEF na Amerika Embesi i bin kamap long dispela kibung tu.

stilm, kilim na bagarapim man, tasol Jisas i kam long givim gutpela laip i stap oltaim." Misis Anne Kerepia, hetmeri bilong YWCA i autim dispela tok bilong Jon sapta 10 na lain 10 long strongim namba wan tingting bilong dispela de taim em i opim de wantaim prea.

"Save bai i lukautim ol yangpela na bai ol i ken karim dispela kantri i go het. Em i wok bilong yumi long was gut long ol yangpela bilong yumi," em i tok.

Dispela em i namba 3 taim nau long YAH klab i go pas long selebretim Wol Yut De. YAH em i wanpela ogenaisesen bilong ol yangpela long helpim ol long lainim ol toktok bilong marit, kamapim pikinini na long lukautim helt bilong ol.

YAH em i ogenaisesn bilong helpim ol yangpela long ol i ken bringim ol narapela lain bilong ol long lainim gutpela pasin bilong laip.

YWCA i save lukautim dispela ogenaisesen na i save sponsa long wanpela progrem long redio ol i kolim, "Tok Stret progrem."

David Rupa i makim maus bilong ol YAH long toktok na em i tok, "Ol yangpela i stap long pasin bilong raun i go i kam. Planti i save bungim planti salens long taim bilong wokabaut. Ol yangpela meri i save bungim pasin nogut i bagarapim ol."

"Insait long PNG, populesen i wok long go antap na em i gat mak long laip bilong ol yangpela tu. Ol skul spes i sot na ol sumatin i sindaun bung, na planti i les long skul bikos ol i painim taim long skul gut," em i tok moa.

"Bai yumi stopim dispela hevi olsem wanem? Ol pipel i sutim tok long ol yangpela na ol yangpela i sutim tok long ol papamama."

"Yumi olgeta luksave long wok bilong yumi wan wan long rausim dispela hevi na mekim wok bilong yumi. Ol bikpela lain i mas kisim ol yut na laikim ol na ol bai lainim pasin bilong laikim ol narapela na kamap gutpela sitisen." Mista Rupa i tok.



SEKIM OL: Bos bilong Lae polis Superintenden Iven Lakatani (namel) i inspektim o glasim wanpela pereid long Bumbu Polis Bareks long las mun. *Poto: Bustin Anzu*



Available @ all BSP Branches Nationwide!

MONDAY - FRIDAY: 8:45am to 3:00pm



Our FX tellers at **Waterfront Place & Vision City Mall** branches in Port Moresby are available 7 days a week:

MONDAY- SATURDAY : 9:45am to 4pm
FRIDAY : 9:45am to 7pm
SUNDAY : 10:45am to 2pm

320 1212 / 7030 1212
servicebsp@bsp.com.pg
www.bsp.com.pg



Koiari Park Sekenderi Skul kisim kompiuta

KOIARI Park Edventis Sekenderi Skul i gat tupela kompiuta tasol na nau ol i kisim 20 moa. Ol sumatin i amamas na i paitim han long taim NCD Gavana, Powes Parkop i bringim ol dispepla kompiuta long ol, skul bilong ol.

Ol kompiuta i kam olsem wanpela mekpas tasol na i kosim K55, 660. Donesen bilong ol kompiuta em i wanpela bilong ol progrem bilong Gavana Parkop long sapotim ol sekenderi skul long helpim ol long lainim samting.

Em i bin helpim pinis Charles Lawanga Sekenderi Skul long yia i go pinis na nau Koiari Park Edventis Sekenderi. Bihainim ol sekenderi skul gavana i gat plen long helpim ol praimer skul na bihain elementeri na kisim

2017, em i plen long karamapim olgeta skul insait long NCD.

Gavana Parkop i putim edukesen bilong ol pikinini namba wan na em i putim pinis K30 milian insait long 5 yia, long kirapim ol klasrum bilong praimer na sekenderi skul, haus tisa, toilet, ol des bilong ol elementeri skul, ol teks buk, laibreri buk na ol kompiuta.

“Bikpela samting mi laik helpim ol skul long ol sumatin mas skul gut na kamap ol ‘A’ gred sumatin,” Gavana Pakop i tok long taim em i givim kompiuta long Koiari Park.

Prinsipel, Erick Passingan i tok tenkyu long gavana long helpim bilong em long Koiari Park na tu long ol arapela

skul long NCD.

Em i tok, skul i bin stat tasol long dispela yia na ol i gat tupela kompiuta tasol, wanpela em bilong prinsipel na narapela ol arapela tisa i save yusim long helpim ol sumatin.

“Tenkyu long yu putim amamas long bel bilong ol sumatin. Taim ol i lukim ol kompiuta em amamas i kilim ol stret,” Mista Passingan i tok.

Gavana i tok, Koiari Park em i nupela skul na isi, isi em bai gro olsem wanpela nambawan skul na em i strongim ol sumatin long wok strong long skul bilong ol.

Em i tok strong long ol papamama long sapotim skul wantaim ol fan resing wok bilong skul, helpim ol pikinini long bihain taim.



Mista Powes Parkop givim kompiuta long skul prinsipel bilong Koiari Edventis Sekenderi Skul.

Ukata sinod

Bustin Anzu i raitim

MOA long wan tausen Kristen manmeri i bin bung long Sikam ples long Kabwum long wanpela bikpela distrik konprens. Dispela bung bai stap inap wanpela wik olgeta.

Dispela bung aninit long het tok: “Wokabaut wantaim bilip manmeri” we ol i kisim aninit long Efasiens 2:10 long Baibel bai putim klostu long 1, 500 Kristen manmeri bilong Evanjelikal Luteran Sios bilong Papua Niugini (ELCPNG) long dispela bung.

ELCPNG Tresera Noreo Keindip i tok ol Kristen manmeri insait long 10-pela seket bilong Kabwum i bin kam bung long ples Sikam insait long Komba Lokol Level Gavman long Kabwum.

Dispela sinod i sta long Ogas 25 na go pinis long Ogas 30. Em i kamap long asples bilong olpela tasol I dai het bisop bilong ELCPNG, Reveren Sir Getage Gam.

Em i tok seket presiden, Boling Komba Presiden Bayuso Basing na ol sinod komiti bilong em i mekim bikpela wok long kamapim dispela wantaim ol kaikai na narapela samting bilong bung.



Keindip (han kais) wantaim sampela deleget log Nadzab ples balus taim ol i weitim balus long go long Konge ples balus.

Sampela hetman long het opis long Ampo i go long dispela bung tu. Dispela ol delegen em Gutnius Dairekta Reveren Binora Yunare na pasto makim het opis i bin go long dispela bung tu.

Ol dispela lain pasto bai kisim sampela taim long Baibel stadi na bungim han long ol narapela samting bilong bung.

Wanpela longpela residen bilong Anta long Lae, Kimbun Keindip i tok planti pikinini Sikam i givim han long kamapim dispela bung long ples bilong ol.

“Planti pikinini Sikam i givim helpim long kamapim dispela bung. Ol i baim kaikai na givim mani na sapotim dispela bung long ples bilong ol. Dispela em

wanpela bikpela samting na mipela ol manmeri long Sikam i amamas long dispela, “Keindip i tok.

Keindip i tok ol kaikai bilong stua i kam long balus na ol i go kisim long Konge ples balus. Kaikai i kam long Lae na ol narapela i kam long sip, we ol i go kisim long Wasu i go antap long ples bilong bung long kar.

Em i tok tu olsem Waimo bris i bagarap longpela taim bihain ren i bagarapim ol na ol i karim ol samting bilong bung na igo long narapela sait bilong wara.

Keindip i tok dispela bris i mekim na ol lain bilong Komba Lokol Level gavman i no save go save go daun long Kabwum stesen long wokim bisnis bilong ol.



Lydia Esong, sales eksekutiv bilong Wantok Nius i kisim ol presen long Michelle Wong, Maketing opisa bilong BSP.

BSP benk i sponsa long Wantok woksop

SELS na maketing na pablik rilesens dipatmen bilong BSP Benk het opis long Pot Mosbi i sponsa long ol prais bilong ol woklain bilong Wantok Niuspepa long taim bilong trening woksop bai kamap long tumoro long Lamana Hotel.

Hetmeri bilong Maketing na Pablik Rilesen bilong BSP, Julie Fraser i tok BSP i amamas long sapotim Wantok Niuspepa wantaim ol dispela presen. BSP i givim ol not buk, pen, ol kep, piggy benk na ID strep long yusim long taim bilong trening.

Colgate

ASKIM
DENTIST



Yu gat askim long tit bilong yu?

Plis ringim “Askim Dentist bilong mipla”
Fri long 7303 2288 tasol

(Em fri long Digicel lain tasol. Ol narapela lain bai yu baim.)

namel long 9am na 5pm Mandei i go lo Fraide inap long 30 Septemba, 2013

Seminari selebretim 50 krismas

LAS wiken i bin lukim Katolik Seminari long Bomana ausait long Mosbi siti i holim tripela de selebresen.

Holi Spirit Seminari em i bikpela skul we ol daosisen seminari i skul long en long kamap pater, i bin selebretim Golden Jubili, o 50 krismas bihain ol bin kirapim dispela kolis ol kempus olsem ol i kolim nau.

Planti Katolik pipel long ol peris long siti, ol pren na wantok i bin stap long ol selebresen i stat long las wik Fraide, go het long Sarere na pinis wantaim bikpela misa lotu long Sande.

Ples i bin pulap long musik, danis, ol toktok na misa lotu.

Long Sande nait, planti i sotwin pinis tasol ol i amamas stap long hap bilong seminari.

Ol lain bilong Kivori Poe viles i bin opim selebresen long Fraide apinun wantaim ol tumbuna singsing na danis long ples we ol sumatin i bin skul long en taim ol i trensferim seminari i kam long Madang long ol yia long 1960.

Bikpela Golden Jubili misa lotu i bin kamap long Sarere moning we Asbisop bilong Mosbi Daiosis, John Ribat i bin go pas long en. Wantaim em en nupela Apostolik Nunsio bilong PNG na Solomon Ailan, Asbisop Michael Barach, Asbisop Douglas Young, Bishop Tony Burgess na Blouin. Sampela pater, Sister, ol riljes na ol arapela Katolik bilip manmeri i bin stap long dispela lotu.

Bihain long lotu, i bin gat ol toktok na bihain, ol singsing tumbuna na danis, music na entanmen.

Long Sande moning misa lotu, Asbisop Young i bin go pas. Bihain, ol singsing tumbuna na danis i bin go het na dispela em i taim bilong ol Siassi, Nabupaka, Kivori Poe komyuniti na ol arapela moa.

Long pinis bilong olgeta selebresen, Bisop Blouin i bin prisanim i go long Holi Spirit Seminari wanpela fes klas stetyu bilong Sen John Vianney em petron santu bilong ol peris pris.

Asbisop Young i bin kisim stetyu long makim Rekta, Pater Peter Artiken.

Pater Peter Miria, Siaman bilong Jubili Ogenaising Komiti na wanpela long ol namba wan grup seminari long kolis we i bin statim skul bilong em long 1968 i bin amamas long ol samting i kamap long wiken.

"Dispela i givim mipela sans long tok tenkyu long God long ol blesing em bin mipela long 50 krismas. "Na tu, long tok tenkyu long planti bisop, pater na ol lei manmeri husat i save sapotim seminari yet.

"Mi bilip olsem seminari bai ron gut long planti moa yia i kam," Pater Miria i bin tok.

Pater Peter Artiken i bin skul long dispela seminari long ol yia long 1980.

Em bin tok amamas long gutpela wiken selebresen nae m i tok tenkyu i go long ol ogenaia na pipel i bin kamap long mekijim selebresen i go gut tasol.

Presiden bilong Katolik Tiolojikel Institut, Pater David Willis, na tisa long akademik eria i bin givim liklik histori bilong seminari.

"Seminari i bin stat long Kap, Madang long yia 1963. Long dispela yia, 30 sumatin bilong olgeta hap bilong kantri olsem Manus Ailan, Bogenvil, Yul Ailan, Wewak, Gorokan a 4-pela bilong Solomon Ailan i bin opim skul. Long 1965, bisop i bin tingting long trensferim Holi Spirit Seminari i kam long Bomana na statim dispela skul we nau i kamap bikpela long kantri bilong ol riljes na pater.

"Planti SVD na MSC pater i tisa long kempus.

"Long ol yia bipo i kam inap nau, ol narapela riljes kongrikesen i go insait na sanapim ol haus bilong ol long kempus.

"Planti developmen i kamap long kempus, Pater Willis i tok.

"Moa yet, long stat bilong 1990 taim ol i kirapim ol narapela seminari long PNG na Solomon Ailan, na tu, kirapim Katolik Tiolojikel Institut long 1999.



Sampela wik i go pinis, Enterprise Centre i bin lonsim namba wan Leadersip Awards bilong ol SME (small and medium enterprise) long Papua Niugini. Mi bin laki long stap long dispela bung we mi yet i bin lonsim namba tri edisen bilong Enterprise Centre Assesment Magazine, we i gat stori bilong 64 bisnis em Enterprise Centre i bin glasim na wokim ripot long ol.

PNG LNG Projek i amamas tru long wok wantaim Enterprise Centre. Mipela i kirapim dispela Centre moa long tripela yia i go pinis long traime na givim save long ol PNG bisnis wantaim ol kampani bilong ol lenona (lencos) we ol tu bai inap long stap insait long Projek long saplaim ol woka, ol materiel, na sevis. Dispela Enterprise Centre em i wanpela as bilong Nesenel Konten Plen bilong mipela. PNG LNG Projek Nesenel Konten Plen i karamapim tripela astingting: Developmen bilong ol Wokmanmeri, Developmen bilong Saplaia na Stratejik Komyuniti Invesmen. Bai mi toktok long Saplaia Developmen long kolum bilong mi tude.

Long taim mipela i bin mekim ol plen bilong Enterprise Centre, mipela i no save olsem bai em i kamapim wanpela gutpela sevis tru. Dispela Centre i bin helpim moa long 15,200 binismanmeri na i winim 8,300 trening de na i lusim 1,200 de long givim edvais na stia toktok i go long ol Papua Niugini bisnis. Long planti ol trening kos na evaluasen bilong 270 PNG bisnis, Centre i bin helpim long givim save na strongim ol lokal bisnis. Em i go pas long kamapim gutpela komunikesen wantaim ol kontrakta bilong PNG LNG, ol sabkontrakta na Projek, na i givim sapot na toksave long we ol i ken kisim mani.

Dispela Enterprise Centre em i wanpela impoten hap bilong invesmen mipela i bin mekim long developim save bilong ol PNG bisnis, wantaim ol lancos, we ol yet i ken kamap wanpela sastenabel bisnis long bihaintaim na sapotim PNG LNG Projek na ol arapela bisnis.

Histori i soim olsem planti ol SME i save bruk daun hariap tru, bikos ol i no gat strongpela bisnis plen na mani long statim bisnis na mekim ol wok, na tu, ol i no klia long besik pasin bilong wok bisnis. PNG LNG Projek i gat sampela gutpela stori, tasol sori tru, i gat sampela bisnis i bruk daun tu. I gat planti samting i mekim ol bisnis i kamap gut, hia em sampela samting i save mekim bisnis i kamap gut: strongpela lida, bisnis plen inap karim kaikai, bihainim stretpela pasin bilong wok, i mas gat disiplin long wok bisnis, redi long lainim nupela samting na putim mani i go bek long strongim bisnis. Mipela i traime long givim helpim long wan wan bilong ol dispela eria.

PNG LNG Projek i mekim komitmen long baim ol samting na kisim ol sevis insait long kantri yet sapos i gat inap na sapos kwaliti bilong en inap long mak mipela i putim na we prais bilong en i orait. Mipela i spendim bikpela mani long baim ol lokal guds na sevis - 8.2 bilien Kina mipela i spendim pinis long PNG, we 1.7 bilien Kina em mipela i spendim long ol lenona kampani tasol. Mi save olsem i gat sampela pipel husat i tok mipela i mas givim moa samting. Mipela wok long putim dispela salens i go pas long taim mipela i mekim disisen long baim ol samting.

Bikpela plen bilong gavman long promotim na kirapim ol SME em i wanpela developmen planti kampani long Papua Niugini i amamas long en. Ol saplaia na ol kastama husat i yusim ol prodak na sevis long PNG, bai skelim nau olsem wanem dispela samting bai kamap. Strateji bilong makim sampela SME bisnis we ol Papua Niugini tasol i ken stap insait long en, em i orait. Tasol sapos ol i makim planti moa, bai hatwok long painim ol kastama long ol bikpela bikpela projek developmen. Wanpela hevi inap kamap sapos ol dispela SME i no inap saplaim ol samting insait long kontrak, o ol saplai i sot, o i no kamap hariap. Hevi bai kamap bikos mani i lus na kastama i lusim bikpela mani long wok bisnis. I gutpela long painim balens o namel rot we tupela hap wantaim i wok gut na long luksave long wanem samting ol bisnis i mas mekim long redi na soim olsem ol tu inap long bungim ol dispela salens.

Long taim gavman i wok long kirapim tingting bilong ol SME, mipela i laik ol arapela lain bai kam na sapotim dispela Enterprise Centre na ol arapela inisitiv bilong givim save long strongim ol Papua Niugini kampani.

Olsem mipela i tok pinis, welkam long salim tingting bilong yu long dispela kolum. Bai mipela traime long bekim olgeta askim, olsem na plis salim email long pnglngproject@exxonmobil.com.

Gutpela de.

**BEYOND BOUNDARIES
SUNDAY, 6PM - 6.30PM**

Topic of the week:

Update on Task Force Sweep Enquiry



FM100
PNG's Information & Music Leader

Text 1610

ALOTAU 107.1	BUKA 100.8	KARKAR 100.5	KUNGA 100.3	LORENGAU 100.3	MT. DIMODIMO 107.1	NAMATANAI 100.3	RABAUL 100.8	TINUPUTZ 100.8
AMBUNTI 100.8	DARU 100.5	KANDRIAN 100.1	KUTUBU 100.2	MADANG 100.8	MT. HAGEN 100.3	NCD 100.3	RAMU 100.3	TOLUKUMA 100.1
ANGORAM 100.8	DREIKIRKIER 100.8	KEREMA 100.8	LAE 100.5	MAPRIK 100.8	MT. HOREATOA 107.5	NUKU 100.8	TABURIL 100.3	WATERHOLES 107.1
ARAWA 100.3	FINSCHAHFEN 100.4	KIKORI 100.5	JAGIFU 100.2	MARKHAM 100.5	MT. KAINGUMA 107.1	PALMALMAL 100.6	TARI 100.5	WAUSULOLO 100.8
BOGIA 100.5	GOROKA 100.2	KIMBE 100.3	LIHIR 100.3	MT. BOREGORO 107.7	MT. TURU 100.8	POPONDETTA 100.5	TELEFOMIN 100.3	WEWAK 100.8



Ol pipel bilong Isten hailans i amamas taim Prait Minista Peter O'Neill i kamap long Goroka taun, Isten Hailans Provins long stap insait long bikpela lotu bung i bin kamap long hap long dispela wik Mande. *Poto: Sape Metta*

Askim bilong ol Jesuit long ol asailam sika

MOA yet long PNG tude, Australia na wol tu, ol re-fuji na asailam sika i wan-pela bikpela samting i stap long tingting, wok na wari bilong gavman, kantri na pipel.
Ol re-fuji na ol asailam sika em ol pipel i ronawe lusim asples kantri bilong ol long painim narapela seif kantri long stap long en bikos bikos i gat pait na sindaun nogut long asples bilong ol.

ol i mas sanap strong, kamap ol masta o papa long kantri bilong ol na wokim olgeta samting long stopim ol pipel i kisim bot long go long hap.
"Yumi bilip olsem ol strongpela polisi yumi mekim long stopim ol bot pipel i kam long Australia em long stopim dai bilong planti pipel long solwara.

Long yumi long PNG na liklik ailan kantri long Pasifik em Nauru, Australia i askim yumi long helpim em long stretim ples bilong putim na stretim ol asailam sika i laik go long kantri bilong em na yumi go insait long piksa na nius we i stap olsem wan-pela bikpela samting long rijen na wol tude.

"Yumi nogat pawa long laip na dai, na ol narapela i no gat ol rait bai yumi no bisi. God i wokim yumi na em i bosim laip, na ol pipel yumi no lukim pes bilong ol na tromoim olsem ol asailam sika i gat wankain pes na ol i save bungim hevi, lap na krai olsem yumi tasol. God i givim ol olsem ol brata na susa, na i gat gutpela pasin na rot yumi ken bihainim taim yumi wet long painim rot long edresim dispela.

Jesuit kongriksen long Australia i wari long ol re-fuji we ol i tok 90 pesen long ol re-fuji na asailam sika i ron long bot na i laik go log Australia long painim seif ples em ol trupela re-fuji.

"I moabeta long gavman i soim rot long givim moral lidasip (o stretpela pasin) long ol pipel bilong Australia husat nau i wari taim ol i wetim gavman i mekim ol wok na toktok long intanesenel level.

Na kongriksen i wokim toktok pastaim long nesenel ileksen long Australia we Oposisen lida Tony Abbot husat i wan-pela memba bilong Jesuit Alumni i sanap resis long posisen bilong Prait Minista.

"Tingim, moa long 90 pesen ol bot pipel i trupela re-fuji i ronawe lusim ol asples long painim seif na gutpela laip long Australia, tasol ol i tromoim ol long ditensen senta long Nauru na Manus.

Long wanpela stetmen we Provinsel o presiden bilong Jesuit Kongriksen long Australia, Pater Stephen Curtis S.J i wokim, em i strongim tok-tok bilong Pop Francis, wanpela Jesuit tu, we em bin mekim taim em i raun lukim ditensen senta long Lempedusa Ailan we ol i putim ol re-fuji bilong Not Afrika i save painim seif ples bilong stap long Yurop.

"Bai olsem wanem long stap olsem wanpela forena o ausait man i nogat mani na wok wan-taim ol liklik rait long wan-pela tarangu kantri long Pasifik i wok long painim hat long lukautim ol pipel bilong em yet?" Pater Stephen i tok.

Pop Francis i putim askim long husat i tingim ol lain i dai long sip taim ol i painim seif ples, na belkros we planti pipel i gat long ol asailam sika.

Long wankain taim, Henry Gallagher em wan-pela sumatin long Riverview Jesuit Kolis, Australia i makim ol Yia 12 sumatin i agensim Oposisen lida, Tony Abbot husat i wanpela sumatin bilong Jesuit skul na 5-pela wanskul Palamen memba, long givim bai patisen sapot i go long Prait Minista Kevin Rudd long "PNG solusen long ol asailam sika" wari.

"Long dispela graun we wol i wok long kamap olsem wanpela viles, yumi kisim tingting we yumi no bisi long ol samting i kamap, olsem hevi ol narapela i bungim we yumi tok dispela i no wari na samting bilong mi," Pater Stephen i tok.

Sumatin Gallagher i tok long Australia i rausim risetelmen rait bilong ol asailam sika na salim ol long Nauru na PNG i no bihainim gutpela nab el sori pasin we "yumi dampim ol hevi bilong yumi long tupelo kantri i no redi long dispela, na ol i gat ol hevi bilong ol yet".

Pater Stephen i tok "ol toktok bilong Pop Francis i toktok long yumi wan nau i yumi wetim ileksen we ol bikpela politikel pati i resis namel long ol yet, na wokim ol asailam sika polisi bilong ol".

"PNG i gat hevi long ol Wes Irian re-fuji, na tu, ol re-fuji bilong em yet wan-taim hevi long vailens long ol meri na pikinini. Na gavman bilong yumi i laik salim ol meri na pikinini i ronawe long ol kain hevi i go long wankain laip," sumatin Gallagher i tok.

Pater Stephen i go het na tok wol yumi stap long en tude i pulap long ol woa na pait, bikpela tarangu pasin na planti milien pipel i lusim ples bilong ol long painim narapela seif ples.

"Tasol planti pipel bilong Australia i kisim tok olsem




DEPARTMENT OF LABOUR AND INDUSTRIAL RELATIONS

Independence Fellowship Scheme

COMING TO YOU... THE PEOPLE!
"Promoting Self-Reliance in Rural PNG"

INDEPENDENCE FELLOWSHIP SCHEME ROADSHOW FOR THE NEW GUINEA ISLANDS



The first ever IFS Roadshow with the support of the Department of Labour and Industrial Relations.

Trinde 18th Septemba - Fraide 20th Septemba, 2013
Gazelle International Hotel, konfrens senta, Kokopo, IS NU BRITEN PROVINS

Dispela em Nambawan NGI Rod So we Independence Fellowship Scheme Projek i ranim long soim aut ol gutpela wok na ol gutpela stori we i bin kamap pinis long soim ol bikpela tingting na driman long kamapim gutpela laip na sindaun. Aninit long Dipatmen bilong Leba na Industriyel Rilesens, IFS tim i amamas long kisim dispela nambawan Rod So go long Niugini Ailan Rijon long soim ol lain i bin win aninit long dispela Skolasip Awod program we i save kamap wanwan yia.

- Ol het toktok bilong dispela Rod so em;
- Veliu bilong Sastenebel Development
 - Wok bilong IFS
 - Rot bilong Rurel Developmen ken go het
 - Ol gutpela stori na ripot i bin kamap
 - Ol gutpela helpim na ol samting insait long Infomol Sekta.

Long rejista, katim dispela hap pepa o fom aninit na salim fax go long IFS ofis long ol namba i stap ya long kisim sit namba bilong yu. **REJISTRESEN EM FRI.**

Dispela Rod So bai soim klia ol gutpela rot na ol samting i stap we ol liklik manmeri long Papua Niugini i no klia long en. Dispela bai kamap olsem maus bilong ol pipol long tokaut na soim aut klia ol gutpela tingting na rot bilong sevis ken kam long en na tu opim dua bilong maket we ol pipel ken salim ol kago na ol samting bilong ol. IFS Scholarship Program yet bai go pas long ol trening long sapatim ol projek bilong ol pipol.

Long kisim moa toksave, plis toktok wantaim Rod So Kodineta Ms Karen-Marie Kula long 3217185 o kolim Projek Kodineta Ms Eleanor Kurem long 3200605. Sapos yu putapim fom pinis orait salim fax go long 3203174 or email long ifspngtraining@gmail.com.

I.F.S Secretariat i go pas long dispela.

KATIM LONG HIA

IFS NGI ROADSHOW PRE-REGISTRATION FORM

Plis raitim klia nem na ol arapela long capitol leta na salim go long IFS long fax 3203174, email ifspngtraining@gmail.com or salim long pas go long Independence Fellowship Scheme, Labour and Industrial Relations, P.O. Box 5644 Boroko, National Capital District. Olgeta rejistresen mas kamap long Secretariat bipo long Fraide 6th Septemba, 2013.

INDEPENDENCE FELLOWSHIP SCHEME
NIUGINI AILAN RIJON ROTSO

Mr/Mrs/Ms/Dr..Other _____

First Name: _____ Family /Surname: _____

Designation: _____ Company/Organisation: _____

Address: _____

Province: _____ Fax: _____ Phone: _____

Email: _____

Attendance: Day 1 Day 2 Day 3 (Tick appropriate boxes)

Embeseda bilong Beljam i tok gutbai long PNG

MINISTA bilong Foren Afeas na Imigresen, Rimbink Pato i tokout olsem Embeseda bilong Kingdom bilong Beljam, His Ekseleksi Patrick Renault i bin tok gutbai long Gavvana Jeneral, Gren Sif, Sir Michael Ogio long Gavman Haus long Fonde 23 Ogas.

"Mi wanbel long pasin wanbel namel long tupela kantri em i wok long gro na i go moa yet," Gren Sif Michael Ogio i tok.

Papua Niugini na Kingdom bilong Beljam i bin stat wok bung long 16 Septemba 1976 yet. Long dispela taim nau, tred na ikonmik

wok bung i no strong tumas. PNG i save baim ol masin, na ol marasin bilong egrikalsa long Beljam.

"PNG gavman i gat bikpela laik long strongim gen dispela wok poroman namel long tupela kantri. Mi kisim bel isi olsem, maski yu kam long pinis

bilong taim bilong yu, yu kam yet wantaim ol bisnis na tred deligesen long PNG," Mista Pato i tok.

Beljam i gat wanpela invesen tasol long Westen Provins nau long wara na senitesen projek Dredeco na Ok Tedi bung wantaim long mekim.

Embaseda Renault i bin go wantaim Fes Sekreteri bilong Politik na Ikonmik Afeas, David Jordens, Vincent Swinnen, Tred Komisina, Kris Put, Tred Komisina, Carlo Schreurs, Deputi Jeneral Menesa, BESI Intanesnesel, Jimmy Vreven, Operesen Menes bilong DEME Dredgin Intanesnel, Loic Printant, Dairekta bilong Operesens Aust. Eloy Water, Emier Connrelis, Jan De Nul na Mista Gert Hendricks bilong Salens Limited.

Mista Pato i tenkyu long Mista Renault long taim bilong em olsem Embaseda bilong Beljam long PNG, na i tok gutbai long em na famili bai go bek long Beljam.

Krai bilong Tamaris i go nating

Sista Lorena Jenal - PNG Katolik Famili Laip Apostolet i raitim

STORI bilong mi em i bilong olgeta lain i mas luksave olsem ol yangpela meri na ol mama i save dai taim ol i lusim planti blut long bagarap ol i kisim long han bilong ol man.

Ating long laip taim bilong mi, bai mi tingim yet wanpela moning, taim ol i singautim mi i go lukim Tamaris, wanpela liklik meri 12-pela krismas tasol, insait long haus sik bilong wanpela provins long Hailans.

Ples bilong Tamaris em i longwe stret, na i nogat haus sik. Wanpela man i bin holim pasim em na i slip wantaim. Man ya i ranawe tasol Tamaris i kisim bel pinis. Em i bin pret long papa bilong em na em i hait na tokim pren bilong em, long tupela bai traim na rausim dispela bebi long bel.

Pren bilong em i no bikpela meri tu, nogat, em i winim Tamaris

long tupela krismas tasol. Tupela i no skul meri na tupela i yusim bus rop long rausim bebi. Wok i no kamap gut na Tamaris i stat long lusim bikpela blut na ol i karim hariap i go long haus sik.

Mi bungim em long dispela haus sik bet. Em i pilim bikpela pen na luk sore stret. Em i pikinini tasol na dispela kain pasin i kamap long em, em i wanpela pasin bilong brukim lo na ino pasin bilong ol man i mekim. Wanpela rabis, pipia pasin tru.

Tripela mun mi stap long sait bilong bet bilong em na harim pen na krai bilong em. Mi ken tingim sampela taim, ai bilong em i save sain olsem ol sta. Long tingting bilong em, em i ken lukim em yet olsem naispela yangpela meri, smat moa olsem long piksa bilong God yet.

Em i no mekim wanpela rong na bilong wanem dispela samt- ing i kamap long em? Em i wanpela pikinini i gat wankain rait long stap aninit long gutpela lukaut, tasol wanpela

man i rausim dispela long rabis pasin stret.

Moa Sans bilong em long gro olsem wanpela naispela meri, gutpela mama, na gutpela save meri i ken wok olsem tisa o samting olsem i bagarapim. Sotpela taim tasol em i holim dispela naispela driman, taim em i slip long haus sik wantaim pen na hevi. Tripela mun pinis Tamaris i lusim laip.

Ating krai bilong Tamaris i singaut yet, "Mi wanpela meri, na blut bilong bebi long bel bilong mi i wok long krai; blut bilong pasin nogut i wok long krai; pawa bilong yu long daunim mi wantaim pret na sem i mekim mi gurua nogut na mi lus nating. Mi meri na blut long bilum bilong bebi bilong mi, na lewa bilong mi i bruk na mi krai yet; mi meri na i hat long mi stap, taim nogat lain i laikim mi. God i mekim mi long givim bel na laikim."

Krai bilong Tamaris em i wankain isi, isi krai bilong planti meri husat i kisim kain bagarap na birua.



Tupex (putim kep) bilong Wantok Niuspepa wantaim Kesi, Wantok strit sela.

Wantok Niuspepa holim trening

WANTOK niuspepa bai holim wanpela trening bilong ol woklain na ol bot memba tumora long Lamana Hotel.

Menesmen bilong kampani i laik skelim ron bilong niuspepa, olsem na long las wik Fonde, olgeta wokman-meri bilong kampani i go aut long strit na i lukluk raun long ples we ol stua na ol strit sela long mekim sampela wok painim aut.

Ol toktok ol wok lain i kisim long dispela wok raun, bai i kamap sampela tul bilong yusim tumora long trening woksop, long kamapim nupela lukluk bilong ronim niuspepa gen.

BSP SALES na maketing na pablik rilesens dipatmen i bin donetim sampela samting bilong yusim long dispela trening.

AGRICULTURE TRACTORS

PORT MORESBY: 323 7957 | Digicel: 7215 0333 / 7217 9815
 LAE: 472 6324 KOKOPO: 982 8748 | email: machinery@agmark.com.pg

NASFUND FM100 TALKBACK SHOW

MONDAY - FRIDAY, 9AM TO 12PM

Participate and be heard on an open forum on National Radio

FM100

PNG's Information & Music Leader

Studio: 323 3777 or 323 3999

ALOTAU 107.1	BUKA 100.8	KARKAR 100.5	KIUNGA 100.3	LORENGAU 100.3	MT. DIMODIMO 107.1	NAMATANAI 100.3	RABAUL 100.8	TINPUTZ 100.8
AMBUNTI 100.8	DARU 100.5	KANDRIAN 100.1	KUTUBU 100.2	MADANG 100.8	MT. HAGEN 100.3	NCD 100.3	RAMU 100.3	TOLUKUMA 100.1
ANGORAM 100.8	DREIKIRKIER 100.8	KEREMA 100.8	LAE 100.5	MAPRIK 100.8	MT. HOREATO 107.5	NUKU 100.8	TABUBIL 100.3	WATERHOLES 107.1
ARAWA 100.3	FINSCHHAFEN 100.4	KIKORI 100.5	IAGIFU 100.2	MARKHAM 100.5	MT. KAINGUMA 107.1	PALMALMAL 100.8	TARI 100.5	WAU/BULOLO 100.8
BOGIA 100.5	GOROKA 100.2	KIMBE 100.3	LIHIR 100.3	MT. BOREGORO 107.7	MT. TURU 100.8	POPONDETTA 100.5	TELEFOMIN 100.3	WEWAK 100.8

Ami opisa na seplin tok sori

LONG 26 Ogas, Nesenel Kavanen De, autsait long haus palamen, ol wokman meri i bin pre long ol wan-wok bilong ol na ol yet.

Insait long dispela bung i gat wanpela meri soldia na loya bilong Defens Fos i bin stap. Long taim em i laik beten, em i tokaut olsem em i laik makim olgeta disiplinierer fos na tok sori long ol yut, mama, na komyuniti long wanem samting ol soldia na ol polis i save mekim taim ol i save go paitim na bagarapim ol lain.

Dispela meri i tok, "Mipela ol opisa i mekim tok promis long taim mipela i sain ap olsem bai mipela i bihainim lo na lukautim ol pipel, tasol planti taim mipela i save bagarapim yupela na mi laik tok sori. Na mi wanpela loya tu, olsem na mi laik tok sori makim ol loa bilong wanem, sampela taim mipela i no save mekim trupela wok na mipela i save tokim yupela olsem mipela i lusim long han bilong jas long mekim disisen bilong em. Mipela i mas sanap long tok tru na bihainim."

Tasol taim em i toktok yet, Pasto Milan, Seplin bilong Air Niugini, i kam aut na i tok, long Sarere tasol, sampela soldia i kam long wanpela 10 sita krusa trak long ATS setelmen, na i paitim na bagarapim pikinini man bilong em long rot. Dispela yangpela man, i sanap arere long rot i stap na taim ka bilong ol soldia i kam wantaim het lait, em i singaut long ol bai daunim het lait.

"Ol i paitim em i nap em i hap indai na mipela karim i go long haus sik. Nau yet em i stap long haus sik na

bel bilong mi i bagarap tru. Tasol nau dispela meri i tok long lusim rong bilong ol, olsem na mi bai lusim rong bilong ol," Pasto Milan i tok.

Long wankain taim, wanpela meri Sandaun i kra i go antap na i tok, i no long taim i go pinis, Alfa kampani long Vanimo i ran long ka i go na lukim tupela brata bilong em i wok long klinim graun bilong tupela i stap na ol i ranim tupela, i go daun long solwara na mekim ol i ran antap long rif. Ol soldia i kisim tupela long ka na i wok long paitim tupela. Tupela i pret na i kalap go daun long ranawe tasol brata bilong dispela meri i brukim tupela lek bilong em.

"Nau mipela famili i laik kotim PNG Difens Fos na dispela ol soldia tasol dispela meri i tok long lusim rong na mipela bai lusim rong bilong ol," meri Sandaun ya i tok.

Seplin bilong Taurama infentri Batalion i sapotim tok-tok bilong meri soldia na em tu i tok sori long makim ol soldia.

Seplin na meri soldia i askim komyuniti long lusim rong bilong ol soldia na polis na tu long ol loya na jastis sistem.

Pasto Jack husat i go pas long dispela de, i luk-save na i singautim tupela man na meri long makim komyuniti long kam na sekan wantaim tupela soldia long soim olsem komyuniti i laik lusim rong bilong ol polis na soldia. Dispela em i lukim wanpela mama na wanpela papa i kam aut na holim han wantaim tupela opisa na ol i pre long tupela long makim olgeta disiplinierer fos na jastis.



I NO ISI: Ol yut bilong Bayer Luteran Peris i putim kamap tumbuna singsing danis long pinisim konprens. Foto: Paulus Tali

Sios na gavman wok bung

Paulus Tali i raitim

SIOS na gavman i mas sanap wantaim long helpim ol pipel long sindaun bilong ol. Sain bilong wok bung i kamap pinis, taim mipela lida bilong lokol level gavman (LLG) na lida bilong sios i soim pes long Evanjelikel Luteran Sios PNG (ELC-PNG) Buang seket konprens.

Nupela lokol level gavman presiden, Sam Sakai, i mekim dispela tok insait long namba 33 konprens bilong ELCPNG Buang seket long 18 Ogas long ples Baya insait long Mumeng distrik, Morobe Provins.

Sakai i bin wanpela woda bipo na i bin wok 20 yia long ol haus kalabus,

Em i singaut long ol pipel i lukluk long gutpela bilong wok bung wantaim sios na gavman.

Mista Sakai i tok tenkyu long ol pipel i makim em olsem presiden bilong lokol level gavman. Na em i tok em i amamas tu long wok bung wantaim ol sios grup olsem konfrens bilong sios i kamap long ples Baya.

Insait long dispela konprens, sios bung i luksave long win bilong presiden Sakai, olsem wanpela pikinini bilong Buang i kisim wok lida.

Long dispela bung ol pipel i soim planti hevi bilong wok sios insait long Buang eria aninit long kongrigesen, peris na seket i go antap.

Wanpela bikpela samting dispela bung i luksave em

long wok bilong Gutnius.

Buang seket konprens i soim olsem, i gat hevi i stap insait long wok lidasip olsem evanjelis, wok pastor, yut lida, hetmeri na arapela lida i mas sanap strong na strongim wok bilong autim Gutnius.

Mista Sakai i tok, em i amamas long sapot bilong ol pipel long mekim em i kamap nupela presiden bilong lokol gavman olsem na em i soim sapot bilong en long wok bung wantaim olgeta level bilong sios.

Mista Sakai tu i soim tingting bilong em long pasin bilong wok gut olsem long rot bilong lidasip insait long akauntabiliti, transparensi na gut gavanens long gutpela bilong ol pipel bilong Buang insait long Bulolo distrik

"Long sait bilong lokol level gavman, mi makim pinis deputi presiden i kam long Manga eria, na wanpela meri bai makim ol meri insait long dispela lokol gavman eria," Sakai i tok.

Memba bilong Bulolo na deputi oposisen lida, Sam Basil tu i bin kisim singaut long kamap long dispela konfrens, tasol em i gat narapela wok bilong em na i no bin kam long bung.

Long pinisim olgeta wok bilong Buang seket konprens, siaman bilong konprens i tok tenkyu long olgeta 6-pela paris bilong Buang seket i wok bung long mekim dispela konprens i kamap gut.

Baya Peris i yusim kaikai na mani mak bilong K10,500 long dispela konprens.

Maureen Hill givim frisa long Modilon haus sik

WANPELA strongpela meri husat i save givim helpim long Madang komyuniti, Maureen Hill i givim wanpela nupela bokis ais i go long Modilon Jeneral haus sik las wik.

Maureen Hill em wanpela strongpela meri husat i stap longpela taim tru long Madang na save go pas long planti komyuniti helpim insait long Madang taun. Em i gat wanpela liklik pilai skul bilong ol yangpela pikinini i lainim samting long gro na developmen bilong ol.

Dispela nupela bokis ais Maureen Hill i givim bai helpim Modilon Haus sik long putim gut ol blut beg.

Sista husat i go pas long Modilon blut benk, Daiyaba Kesa i tok olsem hausik long Madang i nidim stret bokis

ais long holim gut ol blut na kain helpim Maureen Hill i givim em bikpela samting tru.

Em i tokaut tu olsem Modilon hausik i mas gat samting olsem 300 o 500 beg blut i stap oltaim long helpim ol sikman o lain i nidim blut tukim ol i stap long haus sik.

Tasol bikos long hevi olsem nogat frisa o ais-bokis long haus sik, ol i save holim tasol 40 o 50 blut beg i stap.

Sista Kesa i tok ol sik lain husat i no bagarap tumas em ol yet i save kam wantaim man o meri husat i ken helpim long givim ol blut. Narapela bikpela samting Sista Kesa i tokaut long en em mak bilong kisim blut o lain i save givim blut long Madang i daunbilo tru. Dispela mak i daunbilo na i no

soim olsem Modilon em level 5 haus sik long kantri bikos blut benk bilong en i sot tru long saplai bilong blut.

Em i tokaut tu olsem sampela samting i mekim haus sik i sot long blut em i no gat inap wok man meri long go aut long mekim wok long kisim blut na no gat trenspot. Narapela samting tu em ol manmeri long pablik i no save go na givim blut long laik bilong ol yet long helpim arapela.

Misis Hill wantaim ol pren bilong em husat i bin bung long givim bokis ais i tok olsem ol bai traim helpim long bringim moa awenes i go long Madang komyuniti na ol manmeri i ken go na givim blut long sevim laip bilong arapela.



Soldia meri (i putim blue jeans na PNG plak saket) i sanap wantaim 5-pela narapela profesenel lain na ol pasto i sanap baksait.

Digicel i bringim tablet long Alotau

NESENEL Plening Minista na Memba bilong Alotau, Charles Abel i tokaut olsem em bai helpim long bringim WIFI/EG tablet long ol skul na ol helt senta insait long distrik bilong em. Dispela i olsem hap bilong sastenabiliti developmen program bilong em long yusim ol komyunikesen sevis.

Mista Abel i bin tokaut long dispela taim em i sainim wanpela agrimen wantaim Digicel long 20 Ogas aninit long pablik, praiwet patnasip bilong komyunikesen sevis impruvmen, Minista Abel yet i bin kamapim dispela plen long 2012.

“Ol tablet bai i go long 4-pela hai skul pastaim na 14 helt senta insait long distrik bilong mi.

Em i wanpela gutpela wok tru na mi tok tenkyu long Digicel long kamapim gut yet komyunikesen insait long kantri,” Mista Abel i tok.

Em i namba tu taim Digicel na Minista i wok wantaim. Namba wan taim em long Julai 2012, taim

ol i bin sanapim tupela komyunikesen tawa long Rabaraba na Suau. Dispela tupela tawa i mekim na ol ples long Alotau distrik inap long toktok i go long olgeta hap bilong wol. Bipo ol i save wakabout i go longwe tru long painim network long ring i go aut.

Ol dispela sevis i bringim bikpela senis long sosio-ikononomik developmen long ol ples. Taim ol i pinisim dispela 3 yia projek, bai i gat 6-pela tawa olgeta insait long Alotau Distrik.

Moa

Sif Eksekutiv Opisa bilong Digicel, John Mangos na Dairekta bilong gavman bisnis, Gary Seddon i tok tenkyu long Minista long visen em i gat, we i helpim dispela komyunikesen projek long kamap.

“Mipela gat bikpela tok tenkyu long Minista long sapot bilong em. Mipela i givim luksave long dispela wok bung wantaim na i amamas long lukim moa wok bung wantaim Minista,” Mista Mangos i tok.



L-R - Gary Seddon bilong Digicel, Minista Charles Abel, Digicel CEO John Mangos na Fes Sekreteri Sheldon Deilala. Foto: Digicel



Digicel woklain i rit long ol sumatin bilong Barakau Elementeri Skul.

Digicel klinim ol skul long Barakau

Barakau praimer na elementeri skul insait long Sental Provins, i bin kirap nogut long lukim 40 wok manmeri bilong Digicel i raun go lukim ol long Fonde Ogas 15.

Ol dispela wokman meri wantaim ol wok lain bilong Digicel Faundesin i bungim han na i go long skul wantaim het tok, “Klinim na mekim grin”, long bringim sampela lait i go insait long ol klasrum bilong tupela skul. Dispela bai mekim ol sumatin i amamas na skul gut.

Digicel Faundesin i bin helpim Barakau long kirapim klasrum bilong elementeri skul wantaim

K279,000 long yia 2008.

Digicel PNG Faundesin Sif Eksekutiv Opisa, Beatrice Mahuru i tok, “Barakau Praimeri skul na Elementeri skul i stap tru long lewa bilong mipela long Digicel PNG Faundesin. Em i namba wan projek bilong mipela na dispela de bilong helpim nating i soim olsem mipela i save go lukim yet ol projek bilong mipela long luksave sapos ol i wok yet o nogat.”

Hetmasta, John Wasigui i tok tenkyu long Digicel long helpim bilong ol.

“Plis givim bikpela tok tenkyu bilong mipela i go long Menesmen bi-

long Digicel na Bod long sapot i go yet.

Yupela i soim gutpela piksa long ol pikinini long bihain bai ol i kamap gutpela sitisen long komyuniti.

Yupela i no bilong Barakau tasol yupela kam na ritim buk long ol sumatin na stretim ol buk insait long laibreri, na helpim long penim ol wol na klinim skul yad,” Mista Wasigui i tok.

Gary Seddon, Liaison Gavman Dairekta na memba bilong Digicel PNG Foundation Bod i tenkyu long olgeta wokman meri long sapot na taim bilong ol.

Wara kam long Burns Peak

HELT na HIV/AIDS Minista, Michael Malabag, i bin lonsim wara projek long Burns Peak Setelemen long Trinde 14 Ogas.

Em i namba wan taim long dispela setelmen i kisim wanpela wara saplai olsem stat long taim kantri i kisim inpendens i kam i nap nau. I gat 7,513 pipel i save stap long Burns Peak.

NCD Gavana Powes Parkop, wantaim Eda Ranu Bod Siameri, Mary Karo na Sif Eksekutiv Opisa (CEO) bilong Eda Ranu, Henry Mokono i bin stap long kisim sek na soim sapot bilong ol.

Gavana Parkop i tok em bai givim narapela K250,000 long sampela taim bihain, na Misis Karo bilong Eda Ranu i tok em bai givim K100,000.

Mista Parkop i tok long narapela 5-pela yia i go pinis, em i bin painim taim long bringim sevis long Pot Mosbi bilong wanem em i no kisim gut sapot long ol arapela memba bilong Mosbi. Em i tok, taim bilong em long Palamen nau em i gat ol man bilong wok hat olsem Michael Malabag husat i gat tingting long ol pipel na bai sapotim em na wok wantaim.

Misis Karo i tok 13 lain tasol long dispela setel-

men i bin givim vot long Mista Malabag long las ileksen tasol dispela i no stopim em long givim sevis long ol. Mista Malabag i tok em i no wari long ol vot, tasol ol i pipel bilong ilektoret bilong em na em i wok bilong em long helpim ol.

“Bikpela samting em nau mi kam olsem memba bilong yupela na mi laik helpim yupela,” Mista Malabag.

Mista Malabag i tok em bai helpim wantaim K250,000 long helpim Eda Ranu long statim wok nau.

Eda Ranu CEO Henry Mokono i tok mani i kam long Mista Malabag, bai helpim Eda Ranu long putim ol paip wara nau.



Michael Malabag i toktok na Gavana Parkop i givim piksa bilong K250,000 sek i go long Siameri bilong Eda Ranu, Mary Karo. Foto: Harlyne Joku

Baim sosis na sevim wanpela bebi



Yut, Meri na Famili

Pastor Barbara Lunge

Pawa bilong kirap bek long namba tri de

OL Papua Niugini (PNG), yupela kirap na lusim pasin bilong ai slip, na no ken tingting tumas long kisim biknem na namba na ol samting bilong dispela graun. Yupela mas putim ai stret long Jisas Kraus na olgeta promis bilong gutpela samting em i gat long givim yupela!

"Ol manmeri i tok olsem, 'Goan yumi go bek gen long Bikipela. Em i bin bagarapim yumi, tasol bai em i mekim gut long yumi gen. Em i bin paitim yumi na sua i kamap, tasol bai em i pasim dispela sua gen. Taim tupela o tripela de i go pinis, orait em bai i kirapim yumi na bai yumi stap gut wantaim em. Yumi mas wok strong long save long Bikipela, Yumi save, olgeta moning san i save kamap. Na yumi save, long olgeta taim bilong ren, em i save kam daun long graun. Olsem tasol yumi save, Bikipela bai i kam na mekim gut long yumi.' (Hosea 6:1-3)

Bikipela God i wok long toktok long ol profet olsem em i no bin ranawe long ol, nogat, em bai kisim ol i kam bek long em gen, taim ol i tokaut long ol pasin nogut bilong ol na i tok sori na i go bek gen long em.

Nupela Testamen i tokim yumi long narapela bikipela pawa moa, taim Jisas i dai na i kirapim em bek gen long tripela de bihain.

"God i bin kirapim bek Jisas Kraus long matmat. Na sapos spirit bilong God i stap insait long yupela, orait long wok bilong Spirit God bai i givim laip long bodi bilong yupela tu, em dispela bodi bilong i dai." (Rom 8:11)

"Na bai yupela i ken save olsem, dispela strong bilong God oltaim em i wok long helpim yumi ol manmeri i bilip long em, em i bikipela moa moa yet. Yumi no inap tru long skelim strong bilong en. Na dispela bikipela strong bilong God i save wok long yumi, em tasol bipo i bin wok long Kraus. Kraus i dai pinis, na long dispela bikipela strong bilong God, God i kirapim em na i bringim em i go sindaun long han sut bilong em long heven. Olsem na Kraus i stap antap tru long olgeta kain strongpela spirit, na long olgeta hetman na olgeta gavman, na olgeta samting i gat strong. Em i stap antap long olgeta man i gat nem nau long dispela taim, na long taim bihain tu." Efesus 1:19-21

"Nau long dispela de bai mi givim yu strong bilong bosim ol lain manmeri bilong planti kantri. Mi givim yu strong bilong brukim ol samting, na bilong bagarapim ol samting na bilong daunim ol samting, na bilong wokim ol samting na bilong planim ol samting." (Jeremia 1:10)

Long Mande dispela wik, Papua Niugini Gavman, Sios na ol ol bilip manmeri i tokaut long kirap na redi long kisim bek ples bilong yumi insait long nesen bilong Papua Niugini na wol. Tupela yia moa bihain long 2015, bai LNG i stat long salim aut ges na i taim bilong yumi lukim kaikai bilong pen kantri i karim inap long 38 yia. Opim bel na opim yau bilong spirit na bai yu kisim samting bilong yu yet em papa bilong yu i redim i stap. Sapos yu slip yet, nogut bai em i kam na abrusim yu!

Sapos yu laik save moa; toktok wantaim wokmeri bilong Bikipela, Barbara Lunge, Rivers of Grace Intenesenal Ministri. P.O. Box 3063. Boroko. NCD. Papua New Guinea. B Mob 67331426/71075829 DG.

Pat Varley i raitim

"WANPELA grup mama long Kokopo, Is Nu Briten i pasim tok long salim ol pen kek na sapotim Rabaul Frenjipeni Festival.

Mausmeri bilong grup, Pat Varley i tok, long taim ol i kisim mani bai ol i yusim long baim ol taunam bet bilong bebi na givim long ol mama long slipim ol nupela bebi. Em i tok sik malaria i save kilim planti bebi long PNG.

"Mipela taitim bun long bungim mani. Mipela i bin salim sosis tu long taim ol Rabaul Guria i pilai ragbi. Bikipela tok bilong mipela em, "baim wanpela sosis na sevim wanpela bebi," Planti lain i save long dispela hap tok bilong mipela.

"Mani mipela kisim inap stret long baim 1,000 liklik taunam bet, na mipela givimaut long St Mary Vunapope haus sik we ol mama i save karim samting olsem 60 bebi long wanpela wik," Misis Varley i tok.

Ol i givim sampela i go tu long Kerevat haus sik na long ol klinik long taim dokta i wok patrol i go long Napapara na Papatatawa na Guma.

Misis Varley i tok ol i salim



Bebi slip insait long taunam

pinis 1,000 bet na nau ol i wok long givimaut narapela 1,000 moa.

Em i tok ol i bin mekim wanpela fan resing fesen so long Ralum Klap long Kokopo yet. Olgeta klos bilong dispela so i bin kam long ol seken han stua long taun. Bihain long so, ol i bin oksen long ol dispela klos.

Misis Varley i tok ol i tingt-

ing long kamapim dispela fesen so long olgeta yia long bungim mani bilong baim ol taunam bet bilong bebi.

Em i tok i tru olsem ol i no save hamas bebi tru bai i no inap dai long malaria, tasol ol i bilip wok bilong ol bai sevim laip bilong bebi na helpim komyuniti tu.

Em i tok ol arapela manmeri o ogenaisesen i welkam long

givim han long ol na sevim laip bilong ol bebi.

"I gat planti natnat long haus sik na dispela bet bilong bebi bai helpim tru bebi long taim mama i karim em nupela yet."

"Dispela kain bet em i isi long karim raun. Mama i ken brukim na karim i go long ples na long gaden tu, em i no hevi." Misis Varley i tok.

Helpim ol meri long kamapim bisnis

BENK bilong Papua Niugini, wantaim Pasifik Fainensol inklusen Progrem (PFIP) Senta ov Ekselens in Fainensol inklusen (CEFI) na Wimen's Wol Benking i gat bikipela tingting long helpim ol meri bilong PNG i kamap bisnis meri olsem na ol i bin bungim ol wok lain bilong ol bikipela benk na ol maikro benk, insait long Sentral benk tupela wik i go pinis.

Olgeta lain bilong fainens i bungim tingting long ol wok tru ol bikipela benk na ol maikro benk, long helpim moa ol meri long rot bilong kisim mani na lukautim, bihain long yia 2014 na 2015. I luk olsem 50 pesen bilong populesen bilong PNG em ol meri, tasol 30 pesen tasol i gat wok na i mekim mani bisnis insait long kantri. Planti bilong ol, em ol meri husat i save kisim liklik mani tasol long bisnis bilong ol, tasol ol i save go pas long ol wok bilong haus na planti narapela wok we i nidim mani.

Olgeta bikipela benk na ol maikro benk i wanbel olsem ol meri i makim wanpela bikipela hap bilong maket bilong ol, olsem na long woksap ol i wanbel olsem ol bai i givim 50 pesen bilong helpim long fainens i go long ol meri stat long yia 2015. "Em i bikipela samting long tingim ol kain kain wok i stap long inapim bilong ol meri bai i ken kamap strong long we bilong kisim na lukautim mani," Gavana bilong sentral benk, Loi Bakani i tok.

Ol sevis bilong kisim mani i dia tumas na tu i no stap long mak bilong ol meri bai inap long kisim," em i tok moa.

Ol benk na ol bisnis haus bilong lukautim na givim dinau mani i wok long stating kain kain we bilong sevim mani na givim aut dinau mani. Tasol ol meri husat i no save kisim bikipela mani long wok o bisnis bilong ol i painim hat tru long kisim ol dispela sevis long strongim liklik bisnis o sevim mani bilong baim sampela bikipela samting.

Ol lain i kisim trening i wanbel olsem wanpela bikipela rot blok long ol meri i kisim dinau mani em bikos ol i no gat inap mani long benk na tu i no gat planti grup i stap long givim

strong long ol. Ol grup bilong ol meri long ol komyuniti i ken helpim ol meri long inapim dispela nid.

Ol benk na ol arapela bisnis i wok long mani i toktok long mobail benk, tasol olgeta lain long trening i luksave olsem, save bilong kamapim na lukautim mani em i bikipela samting na ol meri i mas save gut long dispela, pastaim long ol i ken yusim mobail mani sevis.

Ol meri i tokaut olsem ol i hat long yusim mobail mani sevis bikos em i gat planti wok tumas. Wanpela wok painim aut bilong GSMA i kamapim olsem long Papua Niugini, ol lukim olsem 47 pesen bilong ol meri na 35 pesen ol man i laik opim mobail akaun tasol ol i nogat save long yusim, olsem na ol i no laik long opim kain akaun.

Woksop i lukluk tu long hevi bilong vailens egens wimen na mani. i gat wanpela wok painimaut Wimen Wol Benking long PNG i soim olsem planti kros na pait insait long famili i save kamap long hevi bilong mani na planti em pait long mani ol meri

i save kamapim long famili. Ol i tok strong olsem, i mas gat rot bilong helpim ol meri long lukautim na groim mani bilong ol. Em bai strongim dispela tingting bilong helpim ol meri long yusim mani na kamap bisnis meri.

Ol wok man na meri bilong ol fainens sevis i mas kisim gut skul long hevi long haus na mani i save kamap olsem wanem, na ol i mas strong long haitim stori bilong mani bilong ol meri.

Wimen Wol Benking i luksave olsem stori bilong ol mama long ol pepa fom ol i pulimapim, na stori bilong mani bisnis bilong ol. I mas gat spes bilong ol meri i no save kisim bikipela mani tumas, na tu long luksave olsem ol sevis bilong ol i sut stret long nid bilong ol kastoma na wanem kain senis ol meri i lukim long laip bilong ol, taim ol i kisim sevis long ol fainens.

Olgeta rekomendesen ol i bin bringim long taim bilong dispela woksop bai ol i kisim i go insait long Nesenal Strateji fo Fainensol inklusen na Fainensol Literesi 2014-15.

Raun Lukim ol Meri na Pikinini:



Kumu meri long Kawawar maket.

Ol sios i luksave long Nesenal De bilong Prea

Frieda Sila Kana i raitim

“PNG bai kirap na wakabaut na kamautim kaikai bilong em taim em i kamap 40 yia long yia 2015, em i taim we LNG ges bai stat long bringim mani i kam insait”.

Pasto Wilson em i wanpela medikal dokta man tu, i bin tok olsem insait long prea bung ausait long Haus Palamen i bin kamap olsem hap bilong Nesenal De bilong Pre selebren long PNG long dispela wik Mande.

Pasto Wilson i autim las tok-tok long buk baibel long John sapta 5 na lain 5, we Jisas i bin oraitim wanpela man i gat 38 krismas.

Dispela man i no save wakabaut na i save slip arere long raun wara Bethesda long wetim ol man bai putim em i go long wara na em bai em i ken orait gen.

“Bilong wanem na Aposel Jon i no raitim nem bilong dispela man, tasol i tok olsem em i gat 38 krismas.

“Em i makim nau PNG bai klostu kamap 38 yia long sanap em yet olsem independen stet,” Pasto Wilson i tok.

Long tingting bilong yumi PNG, 38 yia em i longpela taim tumas long yumi stap olsem sikman, i no nap long wakabaut, tasol long kalsa bilong Israel, 38 yia em i taim bilong kamautim olpela gaden, katim han bilong diwai i no save karim kaikai na redi long kamap 40 yia taim ol i save kamautim kaikai, o long kisim ol prut bilong diwai ol i stretim pinis,” em i tok.



Ol Pasto bilong ol sios long Mosbi i bung long haus palamen, na pre long sios na gavman.

Poto: Frieda Kana

“PNG bai kirap na wakabaut na kamautim kaikai bilong em taim em i kamap 40 yia long yia 2015, em i taim we LNG ges bai stat long bringim mani i kam insait” Pasto Wilson i tok.

Ol lain i pre i makim maus bilong ol 4-pela rijen bilong kantri na ol i bin pre long tok ples stret.

Em ol opis wok manmeri, ol Sande skul pikinini, ol skul sumatin, sios, gavman na ol lain bilong narapela kantri husat i kam stap na wok long PNG.

Long kalenda bilong PNG, Ogas 26 i kamap olsem nesenal de bilong tok sori na tu, long tingim bek wanpela kontrak o tok promis kantri i bin

sainim long yia 2007 wantaim God bilong Israel.

Pastaim Praim Minista, Gren Sif, Se Michael Thomas Somare i bin sainim dispela kontrak long nem bilong kantri na ol pipel bilong Papua Niugini (PNG), wantaim God bilong Israel insait long wanpela bikpela sios bung i bin kamap hia long 2007 we i lukim ol sios long PNG na lain i makim Solomon Ailan, i stap long en.

Tasol bikpela kibung we ol lain i makim gavman na ol sios, i bin kamap long Goroka, Isten Hailans, na Gavana Julie Soso yet i bin go pas long en.

Praim Minista na kabinet i bin go long Goroka bung, tasol long Mosbi tu, ol sios i bin

holim wanpela prea taim long fran bilong Palamen Haus, we Minista bilong Stet Own Entaprais na Memba bilong Kavieng, Ben Micah i bin sponsaim.

Ol pasto bilong Pot Mosbi i bin redim wanpela lotu stat long 4 kilok moning na i bin pinis long 12 kilok belo taim.

Lotu i bin kamap long fran bilong Palamen haus we moa long 1,000 man, meri na pikinini i kirap long moning taim stret na i bung hap long givim luksave long dispela de we God bilong Israel i kamap God bilong Papua Niugini tu.

Samting olsem 30 pasto man na meri i stap na ol i bung pre long sios na gavman.

Vatiken bai tokaut long det bilong santuim Pop John Paul 2

I kam long Zenit Nius Ejensi, Vatiken

KLOSTU taim nau, ol Katolik bilip manmeri long wol bai save long det na taim ol atoriti bilong sios bai tokaut long santuim Pop John Paul 2, nau i da na hetman bilong Katolik Sios long wol inap long Epril 2005.

Nius i kam long Zenit Nius Ejensi long Vatiken i autim tok olsem long Septemba 30 long dispela yia, nau hetman bilong moa long 2 bilien Katolik Sios memba long wol, Pop Francis, bai tokaut long det bilong Pop John Paul 11, Pop John 23 na ol arapela moa.

Prifek bilong Kongriksen long wok i glasim long santuim ol

man, Kadel Angelo Amato taim em i givim ripot i tok Pop Francis i bin tokaut long dispela samting long balus taim em i go bek long Vatiken bihain long Wol Yut De 2-13 long Rio, Brazil tupela wik i go pinis.

“Long balus, taim Santu Papa i wok long ron i go bek long Brazil, em bin tokaut olsem “Cannonisation” o wok long santuim ol lain we sios i lukim ol olsem ol santu manmeri bai kamap long neks yia, 2014.

“Tasol det long tokaut ol husat tru bai kamap ol santu manmeri long sios em ol bai tokaut long Septemba 30, 2013, bihain long wanpela bung ol i kolim long “Copnsistory” we Pop Francis i go pas long em i kamap Santu Papa

tasol i save long opisel de we santuim ol man bai kamap, na em yet bai tokaut,” Kadel Angelo Amato i tok.

Em i tok Pop John 23 i bin wanpela “bikpela propet i bin kirapim Vatiken Kaunsel” taim Pop John Paul 2 i “I man husat i bin kari-maut ol wok na di-velopim”.

Kadel Angelo Amato i lukim tupela pop olsem tupela strongpela as bilong Kristen kalsa na holiness” o pasin santu.

Ol Katolik pipel na ol yut long wol na tu, ol arapela sios, ol wol lida na pablik i bin laikim stret Pop John Paul 2 na ol wok em bin save mekim long toktok gut na wok bung wantaim ol arapela sios, ol sios na ol arapela wol lida, long kamapim pasin sekan na gutpela sindaun long wol.

Ol kalabus lain long Bomana i kisim salens

OL KALABUS lain long Bomana Haus kalabus ausait long Mosbi siti i kisim salens long bihainim Kristen pasin long ol i ken kamap gutpela long ai bilong Bikman, na ol i ken helpim ol arapela kalabus lain long senis.

Komanding Opisa na Ekting Sif Superintenden long Bomana haus kalabus, Kiddy Keko i bin wokim dispela salens long taim 16 kalabus manmeri i bin kisim baptismo long tupela wik i go pinis.


Mista Keko i bin tok dispela de i wanpela spesel de bilong ol kalabus lain long wanem, pawa bilong Holi Spirit i mekim ol i glasim, strongim na givim laip bilong ol i go long ministri bilong Bikpela.

Taim em i autim tok tenkyu i go long ol pasto na ol sios long karimaut ol sios progrem na ol prea long haus kalabus, em bin tokim ol kalabus manmeri husat i kisim baptismo long karimaut ol wok Kristen, bihainim kain pasin we Bikpela bai amamas long en na soim gutpela piksa long ol lain i no kisim Jisas long laip bilong ol.

Pasto Peter Dege bilong True Christ Sios i bin go pas long baptismo seremoni bilong 16-pela kalabus lain i tok ol lain i mas senisim laip bilong ol.

Em bin tok buk Baibel i skulim yumi long save long Tok bilong God, tok sori na kisim baptismo long wara.

“Repent o tok sori i minim olsem senisim we bilong tingting na dispela i no min olsem tanim bel we yumi long PNG i save tok long planti taim.



Redi oltaim

KRISTEN i mas bung wantaim arapela na wantaim Krai, em i lida bilong yumi na redi long bungim em taim em i kam olsem jus long las de.

Dispela em gutpela hap tok, long wanem planti yumi Kristen i paul yet. Planti i ting yumi kristen pinis, yumi wet tasol long Jisas. Planti wok long fokusim wol events na yumi ting wol laik pinis na wet long sios i go na givap pinis.

Planti yumi pasto na strit prisa i giamanim ol pipel olsem Jisas bai i kam tumora tasol na pinisim olgeta mani bilong pipel na ranawe pinis, na ol pinis i pundaun na i stap.

Planti i ting, mi no lapun yet. Mi gat planti taim i stap yet na mi mas pinisim laik pastaim wantaim bia, wantaim meri na wantaim mani.

Planti long yumi ting wok na mani em bikpela samting long laip na famili na i no moa tingim kilim laip bilong yumi.

Tasol tingim, God i bin givim yumi bikpela risoses. Em fisikel wol bilong spes, taim, manmeri, nature na metiriel welt.

Olgeta ol dispela samting em bilong God na yumi mas menesim na givim i go bek long God. Long Santu Luk 12: 32-48, Jisas i tok; klia yumi mas was olsem dispela piksa stori Jisas i givim long yumi olsem bos husat i laikim wokboi bilong em i mas was em God.

Ol wokman husat i mas was na wet na no ken slip em yumi pipel.

De o nait yumi i wok long wet em taim bilong i dai bilong yumi. Yumi i no save wanem taim tru dispela bai i kamap, yumi mas wok na redi na wet long bikpela bilong yumi.

Jisas Krai, long helpim ol arapela husat i gat wari, pret na nid, mekim pasin bel isi na sekan wantaim ol birua, ol wantok na wan blut, ol arapela lain yumi i no save long ol na wok bung wantaim wanpela narapela long pasin Kristen Jisas i laikim long en.

Long kam bung long lotu na mekim wok God i givim long yumi. Taim na de yumi i no ken kaunim nogat! Yumi mas kaunim hama-mas wok yumi mekim long ai bilong God na redi na wet tasol long taim dai bilong yumi i kamap na yumi go long Krai.

Yumi kristen i mas wok hat olsem yumi save taitim bun na wet long fotnait. Wankain olsem yumi mas wok hat long Kristen duti bilong yumi na was na wet tasol long dai na bungim Krai wantaim amamas.

Sapos yumi kamap les na givim beksait wanem wok yumi Kristen i nap long mekim na tingting long yumi yet, em olsem yumi i no redi taim Krai i kam long kisim yumi. Wok redi na wet tasol, wetim husat? Dai na bungim Jisas.

TOK PISIN NEWS
from Radio Australia
radioaustralia.net.au

Radio TOK PISIN long
Radio Australia
101.9FM
Port Moresby

Tok Pisin Service
6am - 7am: 0600; 72-1000K2
7pm - 9pm: 5990; 6020; 9710; 12800K-07

Raun long PNG



Pax Jakupa i go long Canada wantaim Tony Sowersby, bilong Australia na Deb Chapman, wanpela meri husat sapotim wok bilong Pax long PNG na Australia.

PNG artist i go long Kanada

Ol pipel long Not Amerika i luksave nau olsem kalsa bilong ol Pasifik Ailan i no ol woa danis bilong Nu Silan tasol ol naispela waitpela nambis. Ol dispela samting i save kamap long ol muvi, turis buk na long ol kain TV progrem ol i kolim Reality TV.

Wanpela atis bilong PNG, Pax Jakupa, i bin go stap insait long wanpela Simposium em Pasifik Atists Asosiesen i bin redim long Museum ov Antropoloji long Vankuva, Kanada.

Ol i kolim dispela simposium Paradise Lost.

Jakupa na 13 arapela atis bilong Pasifik i bin soim na salim ol wok bilong ol long ol pipel bilong Kanada. Ol dispela atis i bin stori wantaim ol pipel long olsem wanem, at wok bilong ol i strong yet, maski sapos ol samting bilong mekim ol bilas i senis.

Em i namba wan taim bilong Pax Jakupa long go long Kanada. Em i tok, em i bin bungim ol First Nations, o asples pipel bilong Kanada we ol i stori long sindaun na laip bilong ol. Long taim ol i harim stori bilong Pax olsem em i stap long ples stret, 'ol i kraik.' "Ol i kraik bikos ol i lusim ples na kastom na mak bilong ol," Pax i tok.

"Tasol mi lainim planti samting long ol."

Wanpela samting i nupela long dispela raun long Kanada, em long kisim helpim long 'crowd sourcing' - askim ol pren na atis network long helpim long raun bilong em.

Planti ol atis netwok olsem Tony Sowersby, bilong Australia husat i bin go wantaim em long Kanada na Deb Chapman, wanpela meri i sapotim wok bilong Pax long PNG na Australia, i bin mekim dispela wokabaut i kamap gut.

Solomon Islands i tok sori long Vanuatu

Gavman bilong Solomon Ailan i tok sori long gavman na pipel bilong Vanuatu long pasin i no bihainim agrimen tupela i bin sainim long kisim ol laip kau i kam long Vanuatu.

Solomon Ailan bai stat gen long kisim ol kau long Vanuatu.

David Tome, Solomon Ailan egrikalsa minista na Abel Tapisuwe, praivet seketeri bilong Vanuatu egrikalsa minista i tok dispela asua i bin kamap long taim Solomon Ailan i no bihainim stret agrimen na ol i kisim 400 kau long 2011.

Ketel indastri bilong Solomon Ailans i bin pundaun olgeta na gavman i laik kamapim gen olsem na ol i sainim wanpela agrimen

long kisim ol laip kau long Vanuatu.

Tasol Vanuatu i no amamas olsem Solomon Ailan i no bihainim stret egrikalsa na kwarantn lo taim ol i kisim ol dispela kau.

Ol Solomon Ailan i luksave tu long asua bilong ol, tasol ol i laik kisim sampela moa kau.

Solomon Ailan egrikalsa minista David Tome i kisim sampela kastom sel mani, wanpela pik na sampela kaikai na i go tok sori long gavman na pipel bilong Vanuatu.

Ol i stretim pinis olgeta samting long dispela rikonsiliesen seremoni na bai Vanuatu i expotim narapela 400 kau i go long Solomon Ailan long mun Oktoba na sampela moa long bihaintaim.

US i sutim tok long Siria i yusim posin long kilim pipel

SEKRETERI ov Stet bilong USA, John Kerry i wok long stretim toktok long wanpela militeri eksin long stopim Siria long yusim posin ges long kilim ol pipel bilong en.

Mista Kerry i tok militeri fos blong presiden Bashar al-Assad i no tingim ol pipel long taim em i yusim ol strongpla posin ges long kilim ol pipel autsait long Damaskus las wik.

Em tu i tok presiden Barack Obama bilong USA i bilip husait i kamapim dispela pasin i mas sanap long ai blong kot.

Praim Minista Kevin Rudd bilong Australia tu i bin tok em i toktok pinis wantaim Presiden Obama, husait i tok olsem em i wok long skelim tingting long dispela hevi.

Ol toktok bilong Mista Kerry i kamap bihain long ol savelain bilong Yunaitet Nesens (UN) i bungim ol dispela lain husat i bin kisim bagarap. Ol i toktok wantaim ol na kisim blut bilong ol. Long taim ol dispela inspekta bilong UN i go insait long sekim dispela hap na toktok wantaim ol pipel, ol man i holim gan i wok long sut long ol.

Ol UN kemikel weapons inspekta i go raun long wanepela haus sik we ol i wok long tritim ol lain i kisim bagarap long posin ges.

Yunited States Sekreteri ov Stet, John Kerry i tok ol i wok long seklim tingting long kamapim wanpela militeri eksin egensim gavman bilong Siria bihain long em i yusim strongpla posin ges long kilim ol pipel bilong en. Em i tok militeri fos bilong Presiden Bashar al-Assad i kamapim wanpela bikpela hevi long kilim nating ol pipel.



Sekim Gad-Pareid Komanda, Inspekta Fred Kaiwa i kisim i go Morobe Gavana, Kelly Naru long sekim gad ov ona long prisentesen bilong 6-pela ka i go long polis long Lae. **Poto: Bustin Anzu**



WETIM BOT: Tupela marit bilong Karkar Ailan long Madang Provins i wetim motobot long kalap na go bek long ples bilong ol bihain ol bin go mekim sampela raun long taun. Long ol nambis provins, bai yu lukim kain piksa olgeta taim. **Poto: Bustin Anzu**



SELEBRET: Wanpela grup bilong Sentrel Provins i putim kamap ol tumbuna singsing na danis long Holi Spirit Seminari, Bomana ausait long Mosbi siti. SLong las wik Sarere, seminari i bin selebretim 50 krismas bihain ol bin kirapim dispela skul we ol yangpela man i save kisim skul long kamap pater. **Poto: Pater David Willis.**

PacificBEAT Listen to Radio Australia 101.9FM Port Moresby

4, 5, 6am & 4pm, 5pm including sport

Radio Australia current affairs programme which focuses on island nations, bringing news, analysis and in-depth coverage of Pacific current affairs including interviews with political leaders, commentators, and the people who make the Pacific beat.

Taim bilong senisim pasin nau

Laip long PNG i wok long senis nau. Ol senis i kamap long taun i ran hariap tru na i winim ol senis i kamap long ples. I gat moa haus na ol ekspensiv ka na ol susok man i pulap long ol siti na taun.

Arere long ol tu bai yumi painim ol lain husat i raun salim kaikai, bua smok na ol liklik pipia samting ol i baim long ol stua na karim raun. I no gat tok long dispela. Laip i mas go het yet.

I gat ol gutpela senis na ol nogut bilong en i wok long kamap. Senisim pes bilong ol taun na siti tasol em i no gutpela tumas sapos i no gat gutpela senis i kamap long pasin bilong ol pipel tu.

Tude yumi lukim gutpela pasin bilong soim rispek, lukautim ol meri, pikinini, ol lapun na ol narapela manmeri i wok long senis. Dispela kain senis i no gutpela tumas bikos yumi i no bihainim moa ol gutpela pasin bilong sindaun gut wantaim long komyuniti. Dispela gutpela pasin em i strong long kalsa bilong yumi na long Kristen bilip bilong yumi.

Long taim ol pikinini i liklik yet papamama i skulim ol long stretpela pasin bilong stap wantaim ol narapela. Long taim pikinini i go skul, tisa i givim gutpela stia bilong strongim gen gutpela pasin bilong stap gut wantaim ol narapela pikinini. Orait taim pikinini lusim skul na i go aut, ol dispela gutpela pasin em i bin lainim



long papamama na ol arapela tisa long laip bilong em, bai strongim em long kamap wanpela gutpela sitisen bilong komyuniti na kantri.

Soim rispek i stat wantaim ol liklik samting. Pasin bi-

long tok tenk yu, plis, ekskius mi, gutde na pasin bilong bel sori long ol lapun, ol meri na pikinini em i mak bilong man o meri husat i tingting long ol arapela tu na i no long em yet. Pasin bi-

long sanap isi long lain na wetim taim bilong yu long kisim sevis em i narapela eksampel. Maski long sakim manmeri nabaut na kalapim lain i go. Dispela pasin i save kamap oltaim long

pait namel long ol skul em i 'nomal' nau long taun. Bai yumi lukluk tasol o olsem wanem?

Nau em i taim bilong skelium wanem kain samting ol

pikinini i lainim long skul. Ol i kisim save long etiks na morals tu o nogat. Sapos nogat, orait, em i wok bilong ol papamama tu long givim stia long ol yangpela. Fri edukesen i mekim na ol skul i pulap tru. Em i gutpela. Tasol kwaliti bilong save ol pikinini i kisim long skul em i narapela samting gen. Yumi tingting long dispela tu o nogat?

Kantri bilong yumi i nidim ol gutpela stretpela manmeri long go pas long en. Nau em i taim bilong stiaim ol yangpela long kamap ol gutpela sitisen. PNG i no stap olsem long taim bilong ol tumbuna. Yumi stap insait long wol we kain kain manmeri i kam wok wantaim yumi. Pasin bilong yumi i mas senis sapos yumi laik kamap olsem wanpela kantri i develop pinis.

Em i wok bilong yumi ol bikpela manmeri husat i winim planti yia pinis long soim gutpela eksampel long ol yangpela. Wanem samting ol yangpela i mekim bai i soim kala bilong laip bilong famili bilong ol. Yumi givim gutpela skul na save long taim ol i liklik yet, bai ol tu i soim ol dispela gutpela na stretpela pasin long ol narapela. Em i no hatwok. Yumi ken stat long skulim ol long soim rispek na pasin bilong tingting long ol narapela manmeri tu.

WANTOK KOMENTRI

stua, o benk o haus sik o long taim bilong kalap long PMV. Long taim pasin bilong soim rispek i no stap moa long laip bilong yumi, em nau bai planti bagarap i kamap.

Tude long ol taun long kantri, kain pasin bilong pait namel long ol skul i wok long kamap bikpela moa. I no gat ol arapela gutpela rot bilong ol skul i salensim save bilong ol na ol i kirap long pait na bagarapim laip. Ol kain gutpela rot olsem inta-skul spot na skul dibeit na ol holide program i no save kamap moa long salensim ol yangpela bilong tude. Mekim olsem na ol pasin nogut tasol i kamap bikpela moa. I gat rot we ol papamama, skul na komyuniti i ken bung wantaim na painim rot bilong stretim. I luk olsem

Traim ol lo bilong kantri

BIKPELA de bilong prea insait long Papua Niugini long Mande 26 Ogas i no luk gut tru long ai bilong planti pipel long taim 5-pela lain i dai long Mosbi.

Dispela 5-pela lain i dai bihain long ol birua i kilim ol long Waigani, Sabama, Pari Rot, Gerehu na long rot i go long Roku asples long las wiken tasol.

Gavman i bin makim Ogas 26 olsem bikpela de bilong olgeta pipel bilong Papua Niugini ken kisim malolo na lotu na prea long kantri bilong yumi. Prea long gutpela sindaun insait long famili na komyuniti bilong yumi na kamapim gutpela pasin bel isi long wanpela narapela.

Tasol dispela kain birua pasin i no soim wanpela mak we i sut long dispela mining bilong prea de insait long kantri.

PNG em i Kristen kantri na yumi harim pinis planti toktok



bilong Buk Baibel long pasin bilong laikim wanpela narapela. Yumi pret long God na daunim yumi yet na lotu long em. Mekim gut long ol arapela we God tu bai mekim gut long yu taim em tokim yu long las de olsem wanem gutpela pasin yu mekim long mi.

Dispela bikpela prea de i ken stap yet bikos em gavman i makim pinis long kalenda bilong Papua Niugini na yumi bai holim yet long planti yia i kam bihain.

Tasol long daunim kain pasin nogut bilong kilim man i dai na bagarap ol meri i mas gat sampela samting bilong stopim o

daunim insait long kantri bilong yumi.

Yumi harim o lukim pinis olsem Palamen i kamapim pinis lo bilong kilim trabel man husat i kilim dai narapela man o meri. Dispela lo i stap pinis olsem na ating gavman mas mekim i wok na yumi lukim pastaim.

Dispela lo i no wok yet na yumi harim pinis planti lain i egensim Gavman long no ken kamapim dispela lo bilong kilim ol trabel lain. Ating dispela lo i no wok yet olsem na ol birua lain i wok long kilim dai ol manmeri stap.

Ating sapos yumi traime na sapos em i daunim pasin bilong kilim dai ol manmeri insait long kantri, orait larim em stap. Sapos dispela lo i kamapim moa trabel o hevi orait rausim. Palamen i gat pawa long kamapim lo na rausim tu.

Ating Gavman i mas kamapim arapela lo bilong

katim lek na han bilong ol man nogut tu bai yumi ken traime long daunim ol bikpela trabel na hevi olsem stil, hensapim ol lain wantaim sotgan, salim spak brus o mariwana na ol planti arapela bikpela bikpela trabel insait long kantri bilong yumi.

Olsem na planti pipel i wanbel long wokim lo bilong katim han lek o rausim kiau bilong ol man i save reip bai ol noken mekim moa insait long komyuniti bilong yumi.

Em ol samting bilong lo na moabeta ol sios na gavman i ken sindaun gut na skelim tingting na kamap wantaim ol strongpela Lo bilong sevim laip bilong ol pipel bilong yumi na yumi ken painim gutpela sindaun na amamas insait long komyuniti na kantri bilong yumi.

Tingim, lo i no inap wok gut sapos yumi traime. Gutpela senis i no inap kamap inap yumi traime ol sampela nupela lo.

WANTOK

Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500 Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager Elizabeth Konga

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 50%, Lutheran 25%, Anglican 10%, United Church 15%. The company reserves the right to accept or reject any advertisement or other material submitted for publication which it deems contrary to the public interest or its absolute discretion. The publisher's general terms acceptance are available at Word Publishing Company Ltd and are set out on the display advertising form.



Teroris bagarap kompensesen

Tony Abbott i makim kompensesen moni long ol bipo lain husat i kisim bagarap long pasin teroris. Em i kamapim wanpela lejislesen long kompensessim ol lain husat i kisim bagarap long Bali bom long 2002 na 2005. Em i promisim ol long dispela lejislesen ol husat husat i kisim bagarap long pasin teroris bai kisim kompensesen long taim bilong Septemba 11 tu.



Mr Yunupingu

Australia gavman i bin mekim wanpela stet memorial bilong fran man bilong Yothu Yindi ben, Yunupingu long mun Jun long Gulkula. Wanpela hap bilong Yothu Yindi Faundesen enual Garma festival. Tasol meri bilong em i no amamas long ol klen long dispela matmat ples. Em i kros wantaim ol femili memba Yalmay Yunupingu na ol arapela sinia klen memba bilong Gutmatji pipel na laik karim ol i go long kot. Tradisinel hauskraik long Not-Is Arnhem graun bilong leit Yunupingu em wok long go yet. Ol i no planim em yet.



Kemikol wepon bagarap

UN kemikol wepons saveman i raun long wanpela haussik we ol manmeri na pikinini i kisim bagarap long ges nogut. (reuters: Abo Alnour Alhaji) Unite Stet Sekretarei bilong ol stet, John Kerry i kamapim graun wok long ol militeri i ken muvi go insait long Syria gavman long dispela kemikol wepon atek, we ol i blemim presiden Bashar al-Assad wantaim ol fos bilong em long dispela pasin nogut.



Hait sut

Ol hait sut lain (snaipa) i wok long sut i go long kar bilong ol UN ekspet lain insait long Syria, i fosim ol long go bek long tai mol i laik go mekim investiget long kemikol wepon klostu long ples Damascus. Dispela hait sut i kirapim toktok long trabol presiden Bashar al-Assad olsem sapos ol US i mekim wanem kain straik bai kamapim bikpela trabol we ol poro bilong ol, Rasia tu bai kam insait na kirapim moa trabol long rijin.



Rere long go

Bikpela woasip bilong Yunaited Stet i rereim ol woa balus bilong ol long mekim wanpela militeri straik egens Syria na dispela bai kamap klostu nau. Pasin bilong kemikol wepon i stap long han bilong presiden Bashar al-Assad gavman.

Karimaut moa awenes long "climate change"

...Senisim tingting na pasin

Veronica Hatutasi i raitim

NAMBAWAN "Climate Change" Open De long PNG I bin kamap long Ogas 16, 2013.

Na em i sans long kisim moa save na awenes long dispela samting wol i lukim tude olsem wanpela bikpela wari yumi mas mekim samting long en bipo em i leit.

Wanpela selebresen i bin kamap long Sir John Guise Stadium long NCD we ol skul sumatin, ol ki gavman dipatmen ol wok na eria bilong ol i karamapim "climate change", ol developmen patna, ol stekholda na ol lain bilong ol maining, wel na ges kampani, ol lain i wokim ol rot, bris, ples balus na ol bikpela samting olsem we i bagarapim en-vironmen i bin kamap long en.

Pastaim tru, "Climate Change" em i wanem samting, na em i kamap olsem wanem?

"Climate" em taim bilong ren, san na win. Na moa yet tude, yumi lukim na pilim senis long taim bilong san na ren. I gat longpela taim bilong san na tuhat, taim bilong bikpela ren na graun i bruk, guria i kamap we i kamapim maunten pairap na solwara i solap na kamapim birua long ol ples. Planti pipel i dai long en, o em i karim graun na ol liklik ailan i wok long go daun long solwara.

As long "climate change" i kamap em yumi ol man yet na ol bikpela wok long kamapim developmen, na strongim wok mani. Long mekim dispela i kamap, ol develop kantri i kirapim ol bikpela main long kisim ol mineral, ges na wel, katim ol bikpela diwai na bus we i save stopim ol ges o win nogut i pulapim na bagarapim win yumi pulim, klinim ples long sanapim ol faktori, bilding na ol taun na siti, katim ol diwai long wokim timba bisnis na moa.

Dispela i rausim ol bus, diwai na ol rop i save holim graun na ren na solwarai karim graun I go.

Ol kain samting olsem i bagarapim en-vironmen o graun, bus na wara na ol samting i stap antap, insait na aninit long ol.

Isi isi long ol yia long 1970's i kam inap nau, man i luksave long hevi em i wokim na "climate change" i kamap we tude, em i bikpela samting we ol bikpela na strongpela kantri na tu, ol liklik na tarangu kantri i wari long en. Na ol i laik mekim samting long daunim, stopim na kontrolim bipo long wol i kisim bikpela birua tru.

Long dispela namba wan "climate change" Open De, het tok i bin, "Changing the Mindset" o senisim tingting, we na pasin yumi save mekim samting long en.

Na bikpela samting ol bikman i bin tokaut long en long dispela de em long karimaut edukesen awenes i go long pablik. Na ol pipel insait long ol komyuniti i ken kisim save na wokim ol samting bai kontribut long sevim en-vironmen long ol ples, komyuniti na kantri. Na long kontrolim na stopim bagarap na senis "climate change" i kamapim.

Patrick Pruaitch em Minista bilong Fores na Climate Change i bin tok yumi wan wan i ken daunim hevi bilong "climate change" sapos yumi mekim ol liklik samting olsem kilim dai lait taim yu no yusim, kilim swis bilong pawa, autim fen taim yumi lusim haus, wokabout long ol hap i no longwe na no ken ran long kar tasol na ol kain samting olsem.

Em bin tok tu olsem i moabeta long statim wok long senisim tingting na we long wokim ol samting wantaim ol pikinini na ol yangpela pipel.

"Ol yangpela bilong yumi i mas lainim na kisim skul long luksave na bungim ol salens we "climate change" i laik kamapim.

"Tude, aninit long het tok Yumi senisim we long tingting na mekim samting," i soim rot i go het yumi mas bihainim olsem



LUKLUK:

Mista Dion na Mista Pruaitch i lukluk raun long Post PNG stol, wanpela long ol ogenaisesen i bin karimaut ol awenes long dispela de.

PLANIM LONG MAKIM DE:

Liklik seremoni we Minista bilong Fores na Climate Change, Patrick Pruaitch i givim wanpela diwai long liklik skul pikinini meri long planim i makim Open De. Lukluk i stap em Deputi Praim Minista na memba bilong Kokopo, Leo Dion wantaim Eksekutiv Dairekta long Opis bilong Climate Change, Varigini Badira, Dairekta bilong Nesenel Fores Atoriti, Kanawi Pours na wanpela sumatin bilong Pot Mosbi Nesenel Hai Skul.

AMAMAS LONG AWENES:

Cecilia Kasama na Isabel Toulogu em tupela Gret 11 sumatin bilong Kilakila Sekonderi skul long NCD i amamas long ol awenes na nupela save ol i kisim long "Climate Change".

Ol Poto: Veronica Hatutasi

komyuniti i wari long ol samting i ken kamapim hevi na mekim samting long en," Mista Pruaitch i tok.

Em i tok wok i stat pinis long sanapim ol "climate change" komiti long olgeta provins wantaim ol provinsel gavman na edministresen long mekim ol edukesen awenes i go long ol pipel na komyuniti na ol i ken save na redi long ol salens we "climate change" i ken kamapim.

Deputi Praim Minista na memba bilong Kokopo, Leo Dion, i bin opim dispela de we ol skul sumatin long ol NCD skul i bin

pulap stap long en.

Em bin tok gavman i luksave long rot bilong kisim ol naturel risos long en, ikonimi na "climate change" na olsem. Em i tok ol i wok long kamapim wanpela "climate change" polisi o lo we ol wok developmen i mas luksave long "climate change", wanem samting i kamapim, ol kikkbek bilong en, samting yumi ken wokim long dispela tupela samting.

Na long wankain taim, inapim ol samting i stap long ikonimik plen.

Mista Dion i bin tok strong olsem ol wok

awenes, edukesen, edvokesi na save long "climate change" i mas kamap na go het.

Cecilia Kasama na Isabel Toulogu em tupela Gret 11 sumatin bilong Kilakila Sekonderi skul long NCD i bin amamas long stap long dispela Open De.

Tupela i tok "Climate change" Open De i gutpela bikos em i givim klia save long ol sumatin na ol i ken save long mekim wanem samting long daunim ol hevi na bagarap em "climate change" inap kamapim bipo em i leit.



Program bilong Wanwan De

De - Mande - Fraide

6am - 10am - Sankamap show - Host: Kas.T
6:00am - Major Nius Bulletin
6:15am - Komuniti Notis Bod
6:25am - Taim Bifo - wangepa singsing b'long bifo.

Tasol
9:30am - Final aua cruz
10am - 3pm - Morin Trek na Belo Pack
10:00am - Major Nius Bulletin - YUMIFM Nius Senta

2:00pm - Major Nius Bulletin - YUMIFM Nius
2:05pm - YU TOK - komiuniti awenes program
2:45pm - YUMI PANIM WOK Segment
3pm - 7pm - Avinun Draiv Taim - Host: Vaviessie

6:10pm - 7:00pm Mon kamap sho
6:45pm - Komuniti Notis Bod
7:00pm - 9:00pm - COCA COLA GARAMUT
7:00pm - Nius - YUMIFM Nius Senta

Sarere belo cruz - Host: Tuluvan Vitz
1pm - 2pm - Sarere Belo Taim Dedikesen
2:00pm - Nius - YUMIFM Nius Senta
2pm - 6pm - Sarere Avinun Cruz

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op

TUNDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op

TRINDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op

FONDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op

FRAIDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op

SARERE - Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius

SANDE - Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius

Raun wantaim Wantok kru ...

Liklik Mekenik



Nicky Bernard i raitim

OSCAR Vruaka ToBitnatoro Sione i gat wan yia na 8-pela mun na hevi bilong em olsem wangepa 20kg rais beg.

Oscar i gat planti ol liklik toi bilong em long pilai, tasol em save laikim wangepa kar bilong em long wanem em bikpela.

Olgeta moning em save karim kar bilong em kam aut na pilai wantaim, na sapos kar bilongem i no wok gut em bai sidaun na kelim wanem samting i rong long kar bilong em.

Long longpela wiken Oscar i kisim kar bilong em kam aut long haus bilong em na pilai stap, na taim liklik bagarap kamap long kar bilong em, em no wari long ol nil gras em sidaun na lukluk long kar bilong em na stretim stap.

Dispela kar em sais bilong em, tasol em i bikpela long bodi olsem na em lukim dispela kar olsem liklik long sais bilong em.

EMTV Television Guide

FONDE OGAS 29, 2013

4:57 AM G AUSTRALIA NETWORK
5:00 AM G JOYCE MEYER - 1041-4
5:30 AM G EMTV NEWS REPLAY
6:00 AM G TODAY
6:00 AM G CLASSROOM BROADCAST

6:00 PM G EMTV NATIONAL NEWS
7:00 PM G RAIT MUSIK EP#177
8:00 PM G RESOURCE PNG EP#86
9:00 PM G SOKA XTRA EP#87
9:08 PM G HOT SPOT EP#29
9:30 PM G ELITE MUSIC ZONE EP#30
10:00 PM G NRL FOOTY SHOW
11:30 PM G NEWS REPLAY

FRAIDE OGAS 30, 2013

4:57 AM G AUSTRALIA NETWORK
5:00 AM G JOYCE MEYER - 1041-5
5:30 AM G EMTV NEWS REPLAY
6:30 AM G TODAY
6:30 AM G CLASSROOM BROADCAST

11:20am Grade 8 Science
1:00pm Grade 6 Mathematics
1:50pm Grade 6 Science
2:30pm DEPI Program
3:30 PM G KIDS KONA
3:30 PM HI 5 - S6 EP#16/30
4:00PM MAGICAL TALES EP#35/46
4:30PM Jay, Jay the Jet Plane #31/35
5:00 PM G KITCHEN WHIZ S4 EP#11
5:30 PM G LAST MAN STANDING Yr1. Ep
5:55 PM G CRIME STOPPERS
6:00 PM G EMTV NATIONAL NEWS
7:00 PM G IN MORESBY TONIGHT
7:30 PM G NRL ROUND 25
9:30 PM G NRL ROUND 25
11:30 PM G EMTV NEWS REPLAY

SARARE OGAS 31, 2013

4:57 AM G AUSTRALIA NETWORK
6:30 AM G EMTV NEWS REPLAY
7:30 AM G ULTIMATE GUINNESS WORLD
8:00 AM G YOGA SUTRA Ep#23 Rpt.
8:30 AM G Totally Spies Yr1 Ep #17/26 rpt
9:00 AM G Dani's House Yr2 Ep #4/13 rpt
9:30 AM G PARROT MAGICIAN - EP#2 -
10:00 AM G Trapped Yr 1 Ep# 17/26
10:30 AM G Last Man Standing Yr 1 Ep
11:00 AM G AUSTRALIA NETWORK
5:00 PM G PORTRAITS OF A NATION
5:30 PM G OLSEM WANEM Ep#33
6:00 PM G EMTV NATIONAL NEWS
6:30 PM G NRL ROUND 25
8:30 PM G NRL ROUND 25
10:30 PM G NRL ROUND 25
12:30 G EMTV NEWS REPLAY

SANDE SEPTEMBER 1, 2013

4:57 AM G AUSTRALIA NETWORK
6:00 AM G EMTV NEWS REPLAY
6:30 AM G IT IS WRITTEN "7131
7:00 AM G HILLSONG
7:30 AM G JOSEPH KINGAL MINISTRIES
7:45 AM G AUSTRALIA NETWORK
8:00 AM G YOGA SUTRA Ep#24 "Knee"
8:30 AM G BUSINESS PNG# 32 Rpt.
9:00 AM G MARTIN MYSTERY
9:30 AM G OLSEM WANEM- Ep# 33 Repeat
10:00 AM G RESOURCE PNG - Ep# 86 Repeat
11:00 AM G ITALIAN FOOD Ep# 9/13 -
11:30 AM G AROUND THE WORLD IN 85
12:00 PM G AUSTRALIA NETWORK
2:00 PM G NRL ROUND 25
4:00 PM G NRL ROUND 25
6:00 PM G EMTV NATIONAL NEWS
6:30 PM G PACIFIC WAY S8 - Ep#10

TORO



BIABIA



KANAGE



TOKWIN

Sindaun bilong ol asailam sika hia...

Wanem kainkain ol toktok i wok long go ikam wantaim yumi PNG na Australia bai kamapim wanem samting long bihain taim? Yumi wok long toktok i stap na long las wik tasol wanpela bot bilong ol asailam sika i kapsait autsait long Krismas Ailan klostu long Australia. Ating faivpela manmeri idai na planti i kisim bagarap..em bai olsem wanem nau? Bai ol i kam long Papua Niugini na kisim

marasin long hia o Australia bai lukautim ol na bihain salim ol i kam long hia..I luk olsem bihain long ol yia i kam,bai yumi gat hamas tausen asailam sika bai kam long hia na pulumapim Manus ailan, na tingim, Manus ailan em liklik ailan. Na sapos ol i kam insait long ples olsem hailans na setoldaun, mi no save long bihaintaim bilong hailans. Bikos planti ol asailam sika bilong ples Afganistan, Irak o Muslim i save long mekim ol bom long ples bilong ol. Ol i ronawe long bikpela pait long hap.. Bai ol i lainim yumi long we bilong

kamapim ol bom em bai mak nogut nau. Sampela ol birua long traibol pait ples bai kamap olsem ol suisaid bomas long ples bilong ol..Wanem taim ol dispela asailam sika long Afganistan i save long mekim gaden long ples bilong ol? Yu save olsem ol i nogat wail pik, muruk,kapul,sikau, paradais pisin, pisen sinek long ples bilong ol? Em i orait, mi no save, tasol nogut em wok bilong Bikman Papa God i salim ol i kam long hia long PNG long senisim sindaun bilong yumi olsem kristen kantri...*Tokwin Tasol..*

Long yupela ol gutpela *Wantok* rida i save wokim ol Sudoku kroswod pasel, dispela em nupela SUDOKU. Long solvim Sudoku pasel, putim wanpela namba long wan wan bokis na olgeta ro olsem akros, daun, na olgeta liklik 9-pela bokis skwea long bikpela daigrem o bokis (i gat 9-pela olgeta) bai gat ol namba long 1 inap long 9. Wanpela namba i mas kamap wanpela taim tasol long wanpela ro. Wok wantaim ol namba olsem gaid o stia na wok long pinisim wan wan daigrem wantaim ol missing namba we bai mekim yu painim solusen. Tenkyu na gutpela pilai

STATIM PILAI

Lukluk long namba 9 kolom, bilong pasel piksa i stap long han kais. i gat ol sain insait long pasel bai i ken toksave long wanem hap insait long dispela kolom bai namba 3 i go.

Nambawan sain i stap long namba 8 kolom insait long piksa. I gat wanpela namba 3 insait long namba 5 bokis. Bai yumi i no i nap long putim wankain namba tupela taim insait long wanpela 3 x 3 bokis eria, olsem na yumi bai i no i nap putim namba 3 insait long bokis namba foa, faiv o siks insait long namba 9 kolom.

Yumi ken rausim tu tripela bokis daunbilo tru long namba 9 kolom bikos i gat wanpela namba 3 insait long dispela 3 x 3 bokis eria tu. Olsem na dispela namba 3 i mas go long namba 2 o 3 bokis bilong namba 9 kolom.

Laspela sain nau i stap insait long namba 2 lain bilong piksa na em i gat wanpela namba 3 pinis long en. Loa bilong pilai i tambu long wanpela namba i kamap tupela taim insait long wanpela lain, olsem na i gat wanpela bokis tasol nau i stap long dispela namba 3 i go insait — em namba 3 bokis bilong namba 9 kolom.

Bihainim dispela stail na wankain tingting na rausim i nap ol pasel bokis i pulap olgeta. Sapos yu laik save moa long insait bilong dispela pilai, yu ken go long webait long penny-dellpuzzles.com.

EXAMPLE

	7	9				1
2	3	8			6	7
	6		2	7		
7	8	5				
5	2	6		3		
			1	9	5	
		6	3	8		
8	4			9	2	1
2				1	3	

EXAMPLE SOLUTION

8	4	7	9	6	3	5	2	1
1	2	3	8	4	5	6	7	9
5	9	6	1	2	7	4	8	3
9	7	8	3	5	4	1	6	2
4	5	1	2	9	6	7	3	8
6	3	2	7	1	8	9	5	4
7	1	9	6	3	2	8	4	5
3	8	4	5	7	9	2	1	6
2	6	5	4	8	1	3	9	7

Ansa bilong las wik SUDOKU 8

2	6	3	7	9	8	1	4	5
9	7	4	1	5	2	3	8	6
8	5	1	4	6	3	7	9	2
1	2	8	3	4	6	5	7	9
3	4	7	5	1	9	2	6	8
6	9	5	2	8	7	4	1	3
7	1	9	8	2	5	6	3	4
4	8	2	6	3	1	9	5	7
5	3	6	9	7	4	8	2	1

8		6	5		9			
	2	9					5	1
			6	7		4		
2				5	1			4
	5	4		8		6	2	
1			2	4				7
		2		9	3			
	3	1				9	6	
			1		4	2		3

Ansa bilong SUDOKU 9 long neks isu.

EMTV Television Guide

7:00 PM G TOK PIKSA EP#33	4:00PM MAGICAL TALES EP#31/46	5:30 AM G EMTV NEWS REPLAY	8:00 PM G BUSINESS PNG – Ep#32	2:30pm DEPI Program
7:30 PM G 60 MINUTES –	4:30PM Jay, Jay the Jet Plane #27/35	6:30 AM G TODAY	8:30 PM PGR BODY OF PROOF Ep#10	3:30 PM G KIDS KONA
8:30 PM MAO MOVIE – KNIGHT & DAY			“MISSING”	3.30 PM HI 5 – S6 EP#14/30
10:00 PM G HILLSONG Rpt. ...	5:00 PM G KITCHEN WHIZ S4 Ep#8	9:00 AM G CLASSROOM BROADCAST	9:30 PM G EMTV NEWS REPLAY	4:00PM MAGICAL TALES EP#33/46
10:30 PM G EMTV NEWS – Replay	5:30 PM G TOTALLY SPIES EP#17	9:00am Grade 7 Mathematicsfollowed by the Australia Network	4:30PM Jay, Jay the Jet Plane 29/35
.....followed by the Australia Network	“Spies vs. Spies”	9:50am Grade 7 Science		5:00 PM G TRICKY TV #20/23
	5:57 PM G CRIME STOPPERS	10:40am Grade 8 Mathematics		5:30 PM G PARROT MAGICIAN
	6:00 PM G EMTV NATIONAL NEWS	11:20am Grade 8 Science		5:57 PM G CRIME STOPPERS
	7:00 PM G NRL ROUND# 24:	1:00pm Grade 6 Mathematics		6:00 PM G EMTV NATIONAL NEWS
	SHARKS vs. ROOSTERS	1:50pm Grade 6 Science		7:00 PM G FACT FILES: TBA
	9:00 PM G COCA-COLA SPORTS SCENE EP	2:30pm DEPI Program		8:00 PM G TOK PIKSA Ep#32– Repeat....
	9:30 PM G EMTV NEWS REPLAY	3:30 PM G KIDS KONA		8:30 PM MA ARROW Ep 8: “VENDETTA”
followed by the Australia Network	3.30 PM HI 5 – S6 Ep#13/30		10:30 PM G NEWS REPLAY
		4:00PM TBA - MAGICAL TALES	followed by the Australia Network
		4:30PM Jay, Jay the Jet Plane#28/35		
		5:00 PM G KITCHEN WHIZ S4 Ep#9		
		5:30 PM G DANI'S HOUSE YR2. EP#4/13		
		–“Abracadisco”		
		6:00 PM G EMTV NATIONAL NEWS		
		7:00 PM G HAUS & HOME Ep#29		
			4:57 AM G AUSTRALIA NETWORK	
			5:00 AM G JOYCE MEYER – 1041-3	
			5:30 AM G EMTV NEWS REPLAY	
			6:00 AM G TODAY	
			6:00 AM G CLASSROOM BROADCAST	
			Grade 7 Mathematics	
			Grade 7 Science	
			Grade 8 Mathematics	
			Grade 8 Science	
			Grade 6 Mathematics	
			Grade 6 Science	

Ol Progam na Kilok i ken senis oltaim...

Raun wantaim Kanage olgeta wik



Ensin i strongpela yet

KANAGE i kisim malolo bilong em na em i go long Manus long lukim wanpela gutppela poro bilong em. Kanage i stap olsem wanpela wik tasol na em i askim poroman bilong em: 'Poro, inap mi traim laik long wanpela yangpela meri long ples bilong yu?' Poro bilong Kanage bekim olsem: 'Yu noken askim mi. Save stap long yu. Yu traim na lukim sapos wanpela bai laikim o nogat'. Wanpela nait, tupela i go long wanpela danis long arapela ples. Kanage kisim wanpela meri na tupela wokim save long danis i stap. Tupela danis i stap na Kanage askim meri ya olsem: 'Susa mi gat laik long wokim pren wantaim yu'. Meri Sol kirap na tokim em: 'Se, lukim yu yet pastaim. Yu ting kain meri olsem mi bai laik long yu. Lapun pinis ya'. Kanage i tingting i go nogat na em kirap na tokim meri ya: 'Yu tok mi lapun, tasol mi ken tokim yu olsem sampela kar yu save lukim bodi i luk lapun tasol ensin i ron yet. Ensin ya i gat strong yet long go antap long bikpela maunten na veli. Em wankain olsem mi. Mi luk lapun tasol ensin ya save tu long wokim ol bikpela hevi duti wok'.

Kuch Tasol Kavieng

Bekim ol tambu

WANPELA nait, Kanage na famili bilong em redi long kaikai na ol i harim wanpela pairap long dua. Kanage i opim dua na lukim ol tambu bilong em i sanap autsait. Kanage kirap tasol tokim ol long kam insait na bai ol i kaikai. Kanage i sindaun na em i askim ol long pasim ai na bai ol i beten. Kanage i beten olsem: 'Papa God, yu yet save ol tambu i stap longwe long taun. Ol i no save kam long haus bilong mi bipo. Nau tasol ol i smelim gutpela kaikai olsem pis, kakaruk, mit bilong hos na sipsip na sampela ol arapela abus long haus bilong mi na ol i kam kamap. Ol i pulim lain i kam long haus bilong mi long pinisim kaikai bilong famili bilong mi.' Taim ol tambu bilong em i harim olsem, ol i sem



pipia stret na isi tasol ol i kirap na lusim haus bilong Kanage.

BeeRoo Zoo Popondetta

Wisil long laik

KANAGE i go raun long Wewak taun na em i go sindaun na malolo long pos opis. Em sindaun i stap na em i lukim wanpela yangpela meri i wokabout i kam. Kanage i no save olsem meri yah em wanpela "Mondogo" - ol meri wantiam grille. Taim meri ya wokabout kam klostu long Kanage, na em i wisil long em. Meri ya tanim na askim Kanage, 'Yu wisil long mi long wanem. Mi no save lukim kain man olsem yu hia long Wewak. Yu kam long we?' Kanage bekim olsem i kam long Mosbi. Meri yah i lap na tokim Kanage olsem, 'Givim yu i no hat. Tasol nogut yu wan raun tasol na yu giaman tok olsem ai bilong yu i raun olsem moto bilong kanu.' Yu save, maus bilong ol meri Sepik olsem ol pukpuk yah.

R. Gawi Madang

Brukim bus inglis

KANAGE bilong ples Yambuganza long hap bilong Yangoru insait long Is Sepik Provins. Em wanpela man bilong hatim bel bilong ol manmeri. Wanpela taim em i kalap long wanpela PMV na i go raun long Wewak taun. Taim ol ron long rot, Kanage kaikai buai na mauswara nabaut wantaim ol arapela pasindia long ka. Buai i spakim Kanage na em kirap tok Inglis long ol manmeri olsem: "You know me, I am half-kas. My mum is from Yambuganza and my dad is from Wosera Gawi. Wherever you go, you will find me in the toilet, bush, garden and also in

the room". Wanpela man kirap na tokim Kanage, 'Inap yu pasim maus bilong yu'. Kanage harim toktok yah na em bekim olsem: 'Close your gate man. Otherwise I will broke your gate'. Ol manmeri long kar harim dispela bekim bilong Kanage na olgeta indai long lap.

John Pius Leksy Wewak

Paia nating

WANPELA nait, Kanage kisim sot gan na go was long wel pik long bris long wom. Em i sanap was i stap na em i harim wanpela samt- ing i mekim nois. Kanage kirap makim sot gan bilong em long wara na em i lukim wanpela pukpuk i wok long drip antap long wara. Kanage makim sot gan na em i sutim pukpuk. Tasol pukpuk i no dai. Pukpuk yah i go kam klostu long em. Kanage kirap sutim gen pukpuk yah namba tu taim. Wan- tain kan samt- ing i kamap, pukpuk i no dai na em klostu olgeta. Kanage tingting: 'Olsem wanem na pukpuk ya i no dai. Tupela taim olgeta mi sutim na em kam klostu yet!' Kan- age i pret nau na em i kisim tos na sutim i go long lukim wanem samt- ing yah. Tos lait kisim samt- ing ya. Kanage i ting olsem em pukpuk tasol nogat, em wanpela hap pangal bilong saksak. Kanage i bel hat nogut tru olsem em westim tupela katres long pangal na em i no sutim pukpuk.

Moses Bon Yawasoro

Ol skwat!
Salim ol gutpela Kanage tok pilai i kam long:
Kanage Tok Pilai
P.O. Box 1982,
Boroko, NCD
Port Moresby.
Email: jwilson@wantok.com.pg

Migat hevi taim mi raun wantaim wanpela marit man, na mi laikim helpim

Dia Laipain,

Mi painimaut olsem man mi raun wantaim i gat meri. Na mi no bilip long lav bilong ol man husat i marit pinis.

Tasol mi gat bikpela laik long em na mi laikim bai mitupela i serim laip wantaim. Yu ting olsem wanem? Em orait long mi raun wantaim man ya o mi tokim em long lusim mi.

Confused

Dia Pren,

Yu gat bikpela laik pasin long wanpela man husat i marit pinis long meri we i gat wankain piling olsem yu.

Mipela i luksave long ol manmeri husat i save painim isi long gat laik pasin long narapela na long ol manmeri i save painim hat tru long lusim ol.

Mipela i laikim olsem yu mas lukluk long dispela na skelim gut pastaim,



nogut yu gat bel we yu no laikim pikinini long en sapos em i tru olsem dispela man em i stap pas wantaim meri na famili bilong em.

Yu mas save olsem sapos yu gat wanpela pikinini i nogat papa, bai yu bungim bikpela hevi sapos yu nogat gutpela wok na haus long lukautim pikinini bilong yu.

I gat planti man husat i gat wankain krismas olsem yu we yu ken poro- manim na bihain taim, i ken maritim yu na karim ol pikinini olsem blesing God papa i givim.

Em bai gutpela sapos yu na pren bilong yu wantaim meri bilong em i mas lus tingting long dispela pren pasin na yu helpim dispela man long stap gut wantaim meri bilong em na lukautim em.

Serim dispela wantaim wanpela famili man o meri husat yu ting olsem yu ken trastim o askim pasto long givim yu ol gutpela stiatok na tu, pre long yu.

Tenkyu tru, Mi Laipain

Sapos yu gat wari, rait i kam long Lifeline, P O Box 6047, Boroko, NCD. Telipon:3260011. Raitim trupela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori. Laipain

NEM: Nick Kwau
KRISMAS: 30 (Man)
ADRES: PO. Box 1349, Wewak, East Sepik Provins
SAVE LAIKIM: Ritim buk, singsing, go Lotu, mekim pren wantaim arapela and trevol.

NEM: Raphael Iwap
KRISMAS: 18 (Man)
ADRES: St. Michael Secondary School, PO. Box Private Mail Bag, Madang Provins
SAVE LAIKIM: Pilai gems, pilaim musik, operetim Kompyuta, wok teknisen, ritim buk, na go long skul

NEM: Vincent Awon
KRISMAS: 30 (man)
ADRES: Kamate Coca Co-operative Society Limited, PO Box 298 Madang Provins
SAVE LAIKIM: Welding, cocoa trena, menesim bloks, Raising Beans long ekspot, mekim fani, harim musik na painim wanpela meri long maritim na stap wantaim oltaim.

NEM: Junior B. Dadis
KRISMAS: 32 (Man)
ADRES: College of Distant Education, PO Box 2071, Yomba, Madang Provins
SAVE LAIKIM: Go danis, harim reggae musik, lukim CD, tok pilai na go swim

NEM: Jason Elmon
KRISMAS: 19 (Man)
ADRES: Bema High School, PMB Bema, Lae Post Office Morobe Provins
SAVE LAIKIM: Mekim pren, pilai soka, go Lotu, mekim fani na toktok wantaim ol narapela lain.

NEM: Gabriel Bania
KRISMAS: 23 (Man)
ADRES: St. Christopher Primary School Turubu East Coast, C/- Bill Orenge PO Box 466, Wewak ESP
SAVE LAIKIM: Autim tok bilong God, serim toktok ol samt- ing, pilai gspol musik, helpim na mekim wok marimari na go Lotu.

NEM: Jenna Hill
KRISMAS: 35 (Meri)
ADRES: PO Box 90, Adoagyiri, Nsawam Ghana, West Africa - 00233 541705015 e-mel: waysofl@yahoo.com
SAVE LAIKIM: Kantri musik, kukim kaikai, raitim pas na painim wanpela man long maritim

NEM: Rex Yatapsa
KRISMAS: 30 (Man)
ADRES: Wambi DC, PO Box 352, Bulolo Morobee Provins
SAVE LAIKIM: Go Lotu, serim tok bilong God wantaim arapela, stretim hevi bilong ol arapela manmeri, Wok gol na wokim gaden.

NEM: Robert Daniel
KRISMAS: 14 (Man)
ADRES: Kanabea Catholic Mission, PO Box 90, Via Kerema, Gulf Provins
SAVE LAIKIM: Pilai gita, volibol, soka, tats, mekim fani, stori, watsim TV, harim Lotu musik, go skul, tek pat long yut wok, go Lotu na lukautim ol enimal na plans.

NEM: Awaten Kembo
KRISMAS: 20 (man)
ADRES: Bema High School, PMB Lae, Morobe Provins
SAVE LAIKIM: Pilai volibol, vok, basketbol, harim musik, mekim fani, go Lotu, ritim buk na niuspepa na stori wantaim ol poroman-meri.

Goroka So kisim mani sapot long BSP

GOROKA So i wanpela kalsa na bisnis so long kantri husat i winim planti yia nau. Long dispela yia, em i kisim K25,000 i kam long Benk bilong Saut Pasi-fik (BSP) long putim kamap dispela So long neks mun.

Ol bin statim Goroka So long yia 1957 na dispela yia bai namba 65 yia bilong Goroka So.

Dispela So i save pulim ol pipel bilong Isten Hailans Provins yet na ol narapela provins long rijon, Momase na ol arapela moa long soim ol kalsa na tumbuna singsing, danis na bilas bilong ol.

Antap log dispela, ol bisnis haus i save soim na promotim ol prodak bilong ol.

Eria Menesa bilong BSP long Hailans, Stenerd Wai i bin givim K25,000 sek i go long ogenaising komiti long dispela wik. Em i tok BSP i amamas long wok patna wantaim So komiti na putim kamap dispela So long mun i kam.

Em i tok BSP i no givim ol fainensel prodak, ol sevis na ansa bilong ol askim tasol, nogat.

Em i givim sapot tu i go long ol wok we ol komyniti i mekim bai helpim long wok developmen na yuniti bilong kantri.

Em i tok BSP i gutpela kopret sitisen na kontribusen bilong em i go aut long komyniti bai lukim olsem ol bikipela samting

olsem Goroka So i no ken dai, tasol bai ran yet long ol yia i kam.

Na long dispela rot, ol pipel bai holim strong yet kalsa na tumbuna pasin bilong yumi na moa long em tu, ol pipel i soim ol prodak bilong ol.

Het tok bilong so we bai kamap long Septemba na ron long tripela de em, "Kisim strong long kalsa na edukesen (Empowerment through Culture and Education)".

Dispela So bai stat long Septemba 13 na pinis long 15.

Ol lain I go pas long dispela So i tok planti lain bilong PNG yet na ovasis bai kamap.



BSP GIVIM SAPOT: Hailans Eria menesa bilong BSP, Stenerd Wai i givim sekmani i go long ol Goroka So komiti. Foto: BSP Midia

Sir Wilson Kamit joinim PNGSDP

PASTAIM gavana bilong Sentrel Benk (BPNG) Sir Wilson Kamit i joinim bod ov Dairekta bilong Papua Niugini Sastenabel Progem (PNGSDP)

Siamen bilong PNGSDP, Sir Mekere Mourata i tokuat long dispela wik olsem Sir Wilson i joinim PNGSDP wantaim bikipela save na eksperiens na em i makim

BPNG.

Sir Mekere i tok, Sir Wilson em wanpela bikipela save-man long wok ikonoms na em gat nem long kantri na wol long kain kain wok em mekim.

Sir Wilson kisim ples bilong Dokta Jacob Weiss husat i bin makim BPNG long 10 pela yia olsem dairekta.

PNGSDP i bin askim Dokta Weiss long lusim wok bihain long gavman i makim em tim lida bilong gavman long tekova long PNGSDP sea long OK Tedi Mining Limited na kontrolim US\$1.4 bilien Long Tem Fan na ol arapela konflikt namel long gavman na PNGSDP.

Sir Wilson bin statim wok

bilong em olsem Kedet Rises Opis wantaim Sentrel Benk long July 1975. Em bin mekim planti menesmen wok na bihain em i kamap deputi gavana bilong benk long 1999.

Taim em stap gavana bilong BPNG, em bin makim PNG olsem gavana long Intenesenel Moniteri Fan (IMF)

na tu kamap dairekta bilong PNG Sevings na Lon Sosaiti.

Long Epril 2010, Sir Wilson i joinim Bod ov Dairekta bilong Asian Developmen Benk (ADB) long Manila, Philippines olsem Eksekutiv Dairekta. Sir Wilson bin stap dairekta bilong InterOil Corporation long Jun 24, 2013.

Sir Wilson i gat planti gut-

pela histri long mekim komyniti sevis wok olsem kaunsila na Honorary Treser bilong St. Martins Anglican Parish, Boroko na memba bilong Trasti long Anglican Sios long kantri.

Long 2009 em bin kisim luksave bilong Kwin olsem Commander bilong British Empire (CBE).

BSP sapotim PNGIIA wantaim K15,000

PNG institute bilong Intenel Odita (PNGIIA) i kisim sapot bilong BSP, long taim benk i givim K15,000 long putim konferens bilong ol long mun Septemba.

PNGIIA Vias preseden Joseph Abar i tok bikipela tenkyu long BSP long sapotim namba 9 konfrens em bai kamap long 5 go long 6 bilong mun Septemba long Pot Mosbi.

BSP Odit Menesa Norma Marava i tok benk i

amamas long sapotim akaunten long promotim wok bilong ol long bringim intenesenel stended tingting long wok bilong ol long kantri.

Mis Marava i tok bisnis i save kamap wantaim gutpela tingting, save na tu i gat nogut sait tu stap na em i givim salens long wok odit.

Dispela konfrens bai lukim ol akaunten i bung na toktokna save long wanem

samting i kamap long long wok odit na ol tu bai redi long ol bikipela senis na salens long wok odit.

Dispela miting bai lukluk long ol bikipela salens nau bungim wok odit na helpim long kamapim gud gave-nens, akauntabiliti, na trensperseni na helpim long senisim ogenaisesen.

Sampela topil bilong konfrens em; intenel oditing, kopret govenens, na global kraisis.



PNGIIA Vais Preside Joseph Abar (raithan) kisim benk sponsa sapot long BSP Odit Menesa Norma Marava.



Wantok

NIUSPEPA BILONG YUMI OL PNG STRET!

Subscribe for your WANTOK Niuspepa now!!

All you have to do is fill in the form below and arrange for payment and we will dispatch your copy of the WANTOK to you each week. We publish the WANTOK 52 times a year.

AIRMAIL SUBSCRIPTION RATES (includes postage & handling)
 PNG K220.00, Australia/New Zealand US\$110.00, Asia/Pacific US\$150.00
 Rest of the World US\$210.00

NCD HOME DELIVERY
 80t per copy or K65.00 for two or more copies. Office pickup K52.00 per year for a copy.

Please send me.....copy/copies of WANTOK for one year.

I enclose Kina/USD..... as full payment.

Name.....
 Postal Address.....
 City.....
 State/Province.....(abbreviation)
 Country..... Zip/Postal Code.....
 Street Address.....
 Telephone..... Fax.....
 Email.....
 Signed..... Date.....

Address: Subscriptions
 Word Publishing Company Ltd
 PO BOX 1982
 Boroko, NCD 111
 Papua New Guinea

Attn: Luke MEK (Circulation & Distribution)

NGO grup askim long SABL ripot

Stanely Nondol i raitim

ol developa i giaman yusim nem wel palm na ol i mekim loging bisnis na kisim bikipela milien kina winmani.

PNG Eco Forestry Forum i tok tenkyu long ol Australia rises lain long tokaut long ol ausait bisnis save yusim giaman bisnis nem bilong egrikalsa na stilim tumbuna graun na bus bilong PNG. Dispela ripot i tok kantri mas lukluk kwiktai long SABL ripot na mekim samplea samting long ol stil pasin kamap long tumbuna graun.

Forum i tok dispela em I wanpela bikipela toktok long kantri na ol i singaut long Praim Minista Peter O'Neill long tokim ol siaman bilong COI John Numapo husat go i pas long dispela ripot bilong SABL long mas pinisim riop nau na mista O'Neil ken tebolim long palamen na pablik bai save.

Gavman i givim K15 milien long mekim wok paini-

maut tasol em kisim longpela taim tru long siaman-John Numapa wantaim ol Komisn memba bilong em Alois Jirewai na Nicholas Miviri i no pinisim ripot hariap.

Praim Minista Peter O'Neill i bin tokim palamen olsem COI ripot i mas pinis long tupela mun. Em tok sapos inkwairi ripot i no pinis bai gavman lukluk long kisim K15 milien bek tasol dispela tu em popaia na nogat tok klia long COI ripot bilong SABL.

Forum i tok em bin wet long dispela ripot na i no wanbel long wet longpela taim tru. Ol i tok bai ol i tok pait inap dispela ripot i kamap ples klia long Palamen na gavman i bihainim ol rekomendesen bilong ripot.

Forum i tok ol develop i brukim planti lo bilong kantri na tok SABL ripot i mas pinis kwik long lo i ken mekim save long ol.

PNG Eco Forestry Forum i tok Spesel Agrikalsa Bisnis Lis (SABL) ripot em Komisn ov Inkwairi i bin kamapim kisim longpela taim tru na ol i singaut long O'Neil gavman bai hariap na tokaut long pablik i ken luksave

Forum i tok moa long 5.2 milien hekta bilong bus i lus long han bilong ovasis kampani we ol i mekim bisnis bilong katim diwai long nem bilong agro-forestri projek. Forum i wari long ol papagraun i lusim 99 yialis kina na laikim gavman long tebolim ripot bilong SABL.

Forum i mekim dispela singaut bihain long wanpela ripot bilong Dokta Paul Nelson na Jenefer Gabriel bilong James Cook yunivesiti long Australia i kam aut long PNG midia i tok planti

Ol memba sapotim tawa program

BIKPELA Mobail kampani long kantri, Digece PNG i toktok wantaim ol memba bilong palamen long apim komunikesen sevis long ol ples planti memba i sainim dil pinis.

Taim Digece i mekim invesmen bilong en long kantri long 2007, planti manmeri long ples i yusim mobail fon long toktok wantaim family na mekim bisnis na laip isi.

Planti memba bilong palamen i luksave long wok Digece i mekim long kisim komyunikesen sevis i go long ol ples. Na nau planti memba i sapotim dispela wok bilong Digece long surukim sevis i go long ples we Digece netWok i no kisim gut na long ples we nogat netwok bilong Digece i stap.

Twelv pela memba bilong palamen i sainim pepa wantaim Digece pinis long sanapim Digece tawa long ol ples long distrik bilong ol long givim komunikesen sevis long ol pipel.

Aninit long dispela nupela program bai lukim taim Digece bai sanapim tawa long ol ples, na givim vois na data sevis. Bai gat ICT brodben sevis long skul, helt senta na pablik administresen opis, lo na oda na polis.



Digece dairekta bilong Gavman Bisnis Gary Seddon

Fainensminista na memba bilong Tari Pori James Marape na Maining minista Byron Chan i sainim program long sanapim tawa long distrik bilong tupela long givim sevis long ol pipel.

Mista Marape i tok em amamas long wok bung wantaim Digece long kisim sevis go long rurel ples bilong em long Tari na Pori.

Mista Chan i tok dispela dil bai lukim K8 milien tawa rolaut plan long givim gutpela sevis bilong mobail

komyunikeen, ICT, TV na Redio sevis long Namatanai distrik.

Digece dairekta bilong Gavman Bisnis Gary Seddon i tok ol i wok bung wantaim gavman na ol patna bai lukim pipel bilong kantri bai kisim gutpela sevis bilong komyunikesen na ol pipel bai konek long kantri na wol.

Bihain long 7 pela yia bilong Digece mekim bisnis long kantri, Digece netwok i karamapim bikipela hap bilong kantri maski PNG i pulaim long maunten na planti lek na bikipela riva na bus ples.

Mista Seddon i tok Digece i wok hat long kantri long provaidim sans long ol pipel ken stap insait long maket wol long mekim laip isi na sapotim ol yet. Digece i sapotim planti mobail benking wantaim ol kemesel benk long helpim ol pipel kisim sevis na mekim long yusim benk sevis isi.

Digece Mobail Mani sevis i gat 91,000 kastoma na planti selmani kastoma.

Mista Seddon i tok Digece i mekim K1 bilien invesmen long kantri na bai wok hat tru long givim gutpela sevis long ol pipel bilong Papua Niugini.

CPL kisim Kampani ov the Yia awod

CPL GRUP, Kampani i kamap long graun bilong PNG stret, na wanpela bikipela ritela kampani long kantri, nau i kisim awod bilong "Inovetiv Kampani ov da Yia" i kam long PNG institut of Dairekta (PNG ID) long taim bilong ol awod nait bilong ol long las Fonde nait, long Dynasty Restoron.

Wantaim win bilong CPL, Wayne Dorgan bilong PNG ID i mekim tok luksave olsem CPL Grup i sanap tude olsem wanpela institusen bihain long 25 yia wok long ritel indastri. Nau olgeta lain i lukim olsem em soim rot long nupela stail insait long ritel indastri. Em i wok long traim yet long stretim sindaun bilong ol pipel long ol komyuniti em i save wok long en.

Ravi Singh, Grup Sif Eksekutiv Opisa, i tok, CPL em i save go pas long kamapim ol kain, kain wok long namba wan taim, tasol hait tingting bilong ol, em i wok long givim moa luksave long

ol meri insait long wok ples. Na pasin bilong kampani menesmen i save givim spes long olgeta woklain i wok bung, stat long klina i go long manesmen i ken toktok wantaim na i no gat wok mak long ol.

Kampani i gat komitmen long givim nambawan sevis long ol kastoma bilong em olsem na dispela i strongim stret nem bilong CPL.

Singh i tok tu olsem win bilong kampani i kamap long we bilong ol long olgeta taim painim nupela stail bilong mekim bisnis. Long luksave tasol, ating CPL i soim planti nupela rot na stail bilong wokim ritel bisnis long PNG.

Em i bin namba wan long opim bisnis long Bogenvil bihain long taim bilong hevi na em i namba wan bisnis haus long sapotim luksave long ol meri program, "Meri Seif Ples."

CPL em i namba wan kampani stret tu long kamapim wanpela awod bilong kirapim tingting bilong

ol meri Papua Niugini long traim kamap win meri wantaim "Praid ov PNG Awod bilong ol Meri".

Ol i bin namba wan kampani long bringim kampravit lebel mesendais long baset-frenli kastoma na namba wan long kamapim bikipela kastoma loyolti program insait long kantri, "Ril Riwod Plas."

Pastaim long em i winim dispela "Inovetiv Kampani bilong Yia" awod, CPL i bin kisim pinis "Bes Praivet Sekta Emploia Awod" i kam long PNG Human Risos Institut las yia.

CPL Grup long kantri i gat 6-pela strongpela ritel bren bisnis long nem bilong; Siti Famesi, Stop N Sop, Hadwe Haus, Bonkafne, Hommeka, Paradais Sinema na i no long taim tasol ol i opim nupela Igel Bois Pisa. Long 2012, CPL Grup i gat olsem 56 stua insait long kantri na i gat 2,500 wok manmeri, we 95 pesen em ol Papua Niugini stret.



PNG institut bilong ol Dairekta, Presiden Benny Popotai (han kais) givim inovetiv Marketing Kampani ov da Yia awod i go long Grup CEO bilong CPL, Ravi Singh wantaim ol tim bilong em. **Poto: CPL Marketing**



Wantok

Advertise your Business right here!!

We deliver your message right to the remote areas of PNG where others don't go.
Wantok Niuspepa is your medium to communicate your business now.

Niuspepa Bilong Yumi Ol PNG Stret!!




Call the Advertising team on,
Ph: 3252500 Fax: 3252579 or
Email: advertising@wantok.com.pg or
Website: www.Wantokniuspepa.com



Ganglau bai gat nupela hausik

TAIM yu lukluk long ai bilong em bai yu sore stret bilong wanem Baksan Masa, wanepela Komuniti Helt Woka i hat work stret long helivim ol pipol bilong Ganglau, Mindre, Tugiyag na ol narapela ples long Basamuk insait long Raikos, Madang long wok dokta na givim marasin.

Mama ya holim pikinini na Baksan i laik givim sut long pikinini tasol pikinini i krai bilong wanem em i poret long sut ya. Tasol tarangu, dispela pikinini i no save olsem Baksan i laik long helivim em.

Baksan em i save wok long Ganglau Eid Pos klostu tasol long Basamuk Rifaineri bilong Ramu NiCo. Em yet asples Tugiyag. Tasol em i bin pinisim skul long Karkar long yia 1975 na wok long Karkar, Matop, Teptep na ol narapela ples olsem dokta boi.

Em i brukim bus, solwara, nam-bis na karim marasin long sevim laip bilong ol maunten pipol, wara pipol, nabis pipol na solwara pipol tu.

Tete, em i tok maski raun nabaut na Baksan i stap long ples na wok. Tasol stori bilong em i sore stret. Long ol dispela taim, em i save wok olsem wanepela kesual wokman bilong gavaman na kisim pei mak olsem K150. tasol ikam inap 2007 we gavaman i luksave long em olsem wok man bilong gavaman stret.

"Maski ol i luksave long mi, pei i no gutpela tasol mi wok yet," Baksan i tok.

Baksan em i wok long Ganglau hausik we Highlands Pacific I bin wokim bipo na tete i stap ananit long han bilong gavaman.

Tasol em i tok gavaman i no save givim planti marasin na populesin bilong ol pipol husait i sik i antap tumas na marasin i save sot areap.

"Ramu NiCo i save givim marasin mak long K3,000. olgeta mun tasol planti pipol na i no inap. Bipo em orait," Maksan i tok.

Ganglau hausik tu i olupela na nogat gutpela rum bilong dokta boi bai sindaun na wokim wok gut. Na ol haus tu bilong slip i no gutpela, nogat lait na ol samting bilong helvim dokta na fameli bilong em long em bai hamamas na was long sik bilong ol pipol.

Tasol wanepela gutpela nius ikamap olsem gavaman i bai wokim wanepela nupela helt senta long Ganglau ananit long luksave bilong Memorandum ov Agrimen (MOA) bilong Ramu NiCo Projek we gavaman i mas wokim sampela projek ananit long namba tu pes bilong konstruksen.

Dispela nupela hausik em i mak long K1.886 million na papa graun

kampani, Basamuk Entaprais Ltd bai wokim na pinisim insait long 6-pela mun tasol.

Ananit long dispela kontrak bai Basamuk Enterprises i wokim 3-pela haus bilong slip, wanepela ward bilong sik man na meri, wanepela toilet, wanepela nupela generate bilong pawa na ples bilong trumai rabis.

Ol bos man bilong Basamuk Enterprises na gavaman i sainim dispela kontrak long Tunde Agus 6 long Pot Mosebi na nau Basamuk enterprises i reri tasol long gavaman bai givim mani long ol mekim wok.

Dispels hausik, taim ol i pinisim bai helivim planti man na meri wantaim lapun na pikinini husait i sik. Planti hap insait long Raikos i no gat hausik na ol pipol klostu long Saidor na go antap olsem Raikos ai skul save go long Ganglau long kisim marasain. Dispela nupela hausik bai helivim ol stret.

Generel Menesa bilong Basamuk Enterprises, Mista Leo Andrew i tok as tingting bilong Basamuk Enterprises em ino long mekim win moni tasol bai wok hat long kamapim gutpela hausik na givim long ol pipol bilong wanem ol i nidim dispela sevis stret.

Komuniti Helt Woka, Baksan Masa i tok em i hamamas olsem Ganglau bai i lukim nupela hausik na bai givim sevis long ol pipol gut stret.

"Mi save givim marasin long 500 pipol i go 600 long wanwan dei na em planti tumas. Marasin sot na wok man tu i sot na gavaman i mas givim moa marasin na wok man taim i gat nupela hausik," Baksan i toktok.

Em i tok taim bipol ol i save givim liklik marasin em i orait taim nogat planti manmeri tasol tete Rifaineri bilong Ramu NiCo mekim na i gat planti manmeri na marasin na wok man tu i mas go antap.

Ol pipol bilong Basamuk na Raikos i mas luksave tete olsem we i gat ol bikpela risos long kamapim win mani bilong gavaman na kantri, gavaman i save kisim ol bikpela ol infrastraksa sevis i go long ol pipol na asples.

Sapos nogat Ramu NiCo Projek long Kurumbukari Main long Bundi na Basamuk Refinery long Raikos bai ating ol pipol bilong Basamuk na Ganglau bai weit yet long gavaman sevis inap tete.

Tasol ol laki long kisim dispela nupela hausik. Nau, ol i mas lukautim gut na husim long wei bilong em bilong wanem bai i gat plenty wankain helivim bai i kam long asples ananit long luksave bilong Ramu Projek MOA na tu long Nesinel Gavaman.



Baksan Masa i rerim sut long givim long pikinini.



Fri medikal sevis Ramu NiCo givim long ol asples lain long Naru.



Wanpela halevim Ramu NiCo i givim long Basamuk asples meri.

Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisanim.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikpela wok konstraksen long namba tu hap bilong 2008. I kam inap nau, olgeta bikpela konstraksen wok long Krumbukari main sait na Basamuk rifaineri i pinis, na projek i stap redi long kisim komisanim o tok orait long mekim wok. Long wol tu, dispela kain hariap sanapim em i no kamap bipo long wanepela kain bikpela projek olsem, na i daunim olgeta

salens bilong graun na masin bilong mekim wok.

Ol dispela namba i soim kliia mak bilong wok mipela i pinisim:

- Moa long 4.5 milian kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil bilding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paiplain)

'Wanpela Ramu NiCo, Wanpela Komuniti'

Ol kakao fama long Karkar Ailan kisim helpim

Ol ketel fama long Sialum bai kisim bot

KAKAO, kopra, kopi na ol narapela egrikalsa bisnis em ol baksait bun bilong kantri. Bikos long taim ol-geta narapela prodak o eria we i kamapim mani bilong kantri olsem maining, wel na ges i pinis, ol dispela diwai bisnis bai stap yet.

Olsem na i gutpela long gavman i givim sapot long kakao na kopra bisnis we i lukim kakao i bungim sampela hevi long kakao pod bora (CPB) binatang i bagarapim ol kakao sid long sampela hap bilong kantri.

Madang em i wanpela strongpela kakao na kopra provins tasol nau em i wok long kisim taim bikos prais bilong kakao i pundaun. Dispela i bihainim CPB binatang i bagarapim ol kakao sid.

Long wokabaut bilong em i go long Madang Provins long stat bilong dispela mun, Praim Minista Peter O'Neill i bin tok promis olsem gavman bilong em bai givim K15 milien long helpim sabsidaisim kos bilong kakao na kopra.

Wok projek bilong

kamapim gut gen kakao bisnis long Karkar Ailan em PNG Sastenebol Development Progem Limitet (PNGSDP), Nesenel Gavman na Sumkar Join Distrik Plening Na Baset Praioriti Komiti (JDPBPC) i fandim.

"Gavman bilong mi i hatwok long inves o helpim pipel na egrikalsa i ken strongim ol long lukautim ol yet. Long dispela rot, pipel i ken helpim long developim kantri," Mista O'Neill i tok.

Em bin tok i no maining tasol i helpim pipel, tasol em i tok strong olsem egrikalsa em i baksait bun bilong dispela kantri.

Em i tok O'Neill-Dion gavman i putim bikpela mani long egrikalsa sekta long wanem, olgeta pipel na moa yet long ol rurel eria, i save stap long en.

Long wankain taim, Sif Eksekutiv Opisa bilong PNGSDP, David Sode i tok aninit long dispela projek, ol bai givim ol fama ol nupela kakao stok we ol binatang no inap bagarapim, trenim ol fama long dispela ol nupela



samting na kamapim gut ol plantesin.

Mista Sode i tok projek ya bai helpim moa long 10,000 famili fama long Karkar Ailan. Em i tok laip na sindaun bi-

long ol bai kamap gut taim ol diwai kakao bilong ol i kamap na karim gut bihain long ol i trening long wok bilong was na stopim CPB sik.

Bikos long CPB binatang i

bagarapim ol kakao long Karkar Ailan, mak bilong kakao prodaksen i bin stap pastaim long 2000 ton long 2010 i bin pundaun i go daun long 850 ton long las yia.

OL KETEL (bulmakau) fama long Sialum long Tewai-Siassi Distrik long Morobe Provins klostu bai gat rot bilong kisim ol kau na ol narapela gaden kaikai i go long ol maket long salim.

Memba bilong Tewai-Siassi, Mao Zeming i tokaut long dispela samting las wik.

Em i tok Tewai-Siassi Join Distrik Plening na Baset Praioriti Komiti (JDPBPC) i tok orait pinis long baim wanpela nupela bot bai helpim ol fama na ol asples lain long trenspotim o kisim ol ketel, ol kes krop na ol gaden kaikai i go salim long ol maket long taun.

Mista Zeming i tok O'Neill-Dion Gavman i luk-save olsem bisnis bilong lukautim na salim ol bulmakau em i wanpela bikpela eria we em i laik developim aninit long ol liklik na namel (SME) bisnis na egrikalsa na laipstok.

Long wankain taim, ol ripot i tok gavman i no luk-save long eksekutiv bilong Sialum Ketel Famas Asosiesen na i moabeta ol i lusim wok ol i holim nau bikos ol i kamapim hevi namel long ol fama.



Em bai mekim yu laikim **sampela moa!**



PROUDLY **PNG MADE**



RD TUNA CANNERS LTD.

Redi long wokabaut



Bipo long mi stori moa long wokabaut bilong PNG tim i go long Pasifik Mini Gems long Walis na Futuna (Wallis & Futuna), mi gat liklik tok-save long dispela hap pes bilong nambawan niuspepa bilong yu.

Stat long wik i kam bai yu painim ol stori na piksa bilong Pasifik Mini Gems tasol long hia.

Dispela bai ron inap tupela o tripela wik tasol olsem na yu noken abrus long kisim wanpela kopi bilong Wantok Niuspepa stat long dispela wik i go.

Long hia bai yu bihainim gut ol stori na piksa bilong olgeta resis we i wok long kamap long Walis na Futuna ailan namel long ol namba wan spotsman meri bilong yumi na ol arapela Pasifik kantri.

Orait, nau bai mi stori moa long wokabaut bilong tim.

Wanpela bung bilong tim i bin kamap aste (Trinde) long Gateway hotel long Mosbi we ol pilaia, ofisol, ol spona na bikman meri bilong gavman na kantri tu i bin kamap long amamasim tim bipo ol i lusim kantri go long dispela bikpela pilai.

Tim bai lusim kantri long dispela Sarere, Ogas 31 na kisim balus i go stret long Walis ailan we ol bai stap long en.

I gat tupela ailan i kamapim dispela ples, wanpela em Walis na narapela em Futuna.

Em i no wanpela independen kantri, em i stap aninit long was bilong Frens (France) olsem mama kantri bilong en.

O yu ken tok olsem Walis na Futuna em i no wanpela kantri em yet tasol i wanpela teritori (territory) bilong Frens.

Long go long Walis na Futuna, bai yu kisim balus i go abrusim Fiji.

Ron bilong bikpela balus bai nap 5-pela hawa olgeta long ron stret long Mosbi go long Walis.

Populesen bilong ailan i aninit long 500, 000 na ol manmeri long hap i gat tupela mama tokples, wanpela em Frens na narapela em asples tokples bilong ol yet.

Planti ol bikpela pilai bai kamap long mama pilai graun long Walis ailan tasol nambis volibol (beach volibol) bai kamap long Futuna ailan we i no longwe tumas.

PNG Tim i kisim ol yunifom bilong ol long Mande dispela wik na ol i redi tasol long kalap long balus.

Trening bilong ol tu i wok long go daun liklik long givim taim long ol pilaia i malolo bipo long bikpela gem bilong ol.

Opening seremoni bilong Mini Gems bai kamap long Mande wik i kam (Septemba 2nd).

Gem bai pas long Septemba 12.

Namel long dispela taim bai yu lukim planti ol bikpela resis na salens i kamap namel long ol nambawan spotsmanmeri bilong Pasifik.

Ol spotsmanmeri bilong PNG tu bai soim save na strong bilong ol long traim na winim planti medol bilong kantri.

Putim ai tasol long hia na bai yu ken lukim na save long olgeta stori na eksen bilong Pasifik Mini Gems.

Antap long dispela, sapos yu gat e-mel, yu ken salim ol tok amamas na sapot bilong yu i go long tim long adres; teampngwf13@gmail.com o long Pesbuk (Facebook) grup "Team PNG Wallis & Futuna 2013".

Em tasol na lukim yu gen long wik i kam taim yumi stori long ol namba wan eksen bilong Mini Gems.






DIGICEL KAP: Bikpela fowed bilong Mioks i brukim banis bilong Vipers. Mioks i pait strong long kam bek tasol taim kisim ol. Vipers i win 28-16

Ol spot eksen poto long wiken...

Ol Poto Nicky Bernard.



HOKI: Namel man bilong Yunaited i painim ol pilaia bilong em long salim bal.



SOKA: Nasa bilong Blue Kumuls wantaim bal long wiken pilai bilong ol.



Long pela kalap meri long prektis bilong em.



TRAIM SPIT: Ol junia sprinta bilong 200 mita long wiken trail.

- Weekend Sports Draws -

Digicel Cup Round 21

2013-DIGICEL CUP FINALS SERIES

WEEK 2 RESULTS: Lahanis 15 Gurias (GRK) 14, Vipers 28 Mioks 16 (POM)

Week 21

SUNDAY, 01 SEPTEMBER

Match 95: Loser of Match 93 vs. Winner of Match 94
Rabaul Gurias vs. Port Moresby Vipers

TOKSAVE: Salim ol spots dro bilong yu kam long Feks; 325 2579, e-mel; bveo@wantok.com.pg o kam lusim long Wantok Niuspepa opis long Able Building Complex long Central Waigani, NCD.



SPOTS DRO RAUN 25

Fraide: Ogas 30, 2013

Suncorp Stadium
Broncos V^s Knights

Allianz Stadium
W/Tigers V^s Rabbitohs

Sarare: Ogas 31, 2013

Mt Smart Stadium
Warriors V^s Raiders

ANZ Stadium
Bulldogs V^s Panthers

Brookvale Oval
Sea Eagles V^s Storm

Sande: Septemba 1, 2013

Toyota Stadium
Sharks V^s Cowboys

Allianz Stadium
Roosters V^s Titans

Mande: Septemba 2, 2013

ANZ Stadium
Eels V^s Dragons



Prop fowet bilong Knights, Kade Snowden i kisim gutpela toktok long referi taim em mekim solda takol long huka bilong Cowboy Ray Thompson. Refer i rausim em long fil bihain long dispela takol nogut. (Getty Images: Ian Hitchcock)

Oi Cowboy i winim gem 26-6 long Sarere nait long Townsville.



Ryan Hoffman i skoa tupela taim bihain long ol Storm i blokim difens bilong Parramatta gut tru. (AAP: Ian Knight) Melbourne Storm i rol tasol na winim ol Parramatta 64 - 4 long AAMI Park na suruk yet i go insait long gren painol bilong NRL.

Raun 24 Poin Leda

Pos	Tim	W	B	L	D	Pts
1.	Roosters	17	2	5	0	38
2.	Rabbitohs	17	2	5	0	38
3.	Storm	15	1	6	1	35
4.	Sea Eagles	14	2	7	1	33
5.	Sharks	13	2	9	0	30
6.	Bulldogs	12	2	10	0	28
7.	Knights	10	2	11	1	25
8.	Cowboys	10	2	12	0	24
9.	Titans	10	2	12	0	24
10.	Panthers	10	2	12	0	24
11.	Warriors	10	2	12	0	24
12.	Raiders	10	2	12	0	24
13.	Broncos	9	2	12	1	23
14.	Tigers	7	2	15	0	18
15.	Dragons	6	2	16	0	16
16.	Eels	4	2	18	0	12



Oi Shark i soim tru tru kala bilong ol long taim bilong NRL maina primia i kam klostu. Oi pilai strong tu long nambawan hap bilong gem na pinisim gem na win long fultaim. Skoa i stap long 32-22 long Mande nait. Bipo ol Rooster i kilim ol long 40-0 long faipela wik i go pinis long Shark Park in au senis long Cronulla i kisim bek win long Mande nait.

Jonathan Wright em wanpela bilong ol Cronulla trai-skoa tai mol i memeim Sydney Roosters long Sydney long fes hap bilong Gem. (Getty Images: Mark Nolan)

PNC's Information & Music Leader

FRIDAY 30 AUGUST

7.45PM
ANZ STADIUM

SATURDAY 23 AUGUST

5.30PM
ANZ STADIUM

SUNDAY 1 SEPTEMBER

2.00PM
RAMONDIS STADIUM

ALOTAU 107.1	BUKA 100.8	KARKAR 100.5	KIUNGA 100.3	LORENGAU 100.3	MT. DIMODIMO 107.1	NAMATANAI 100.3	RABAUL 100.8	TINFUTZ 100.8
AMBUNTI 100.8	DARU 100.5	KANDRIAN 100.1	KUTUBU 100.2	MADANG 100.8	MT. HAGEN 100.3	NCU 100.3	RAMU 100.3	TOLUKUMA 100.1
ANGORAM 100.8	DREIKIRKIER 100.8	KEREMA 100.8	LAE 100.5	MAPRIK 100.8	MT. HOREATOFA 107.5	NUKU 100.8	TABUBIL 100.3	WATERHOLES 107.1
ARAWA 100.3	FINSCHHAFEN 100.4	KIKORI 100.5	IAGIFU 100.2	MARKHAM 100.5	MT. KAINGUMA 107.1	PALMALMAL 100.6	TARI 100.5	WAU/BULOLO 100.8
BOGIA 100.5	GOROKA 100.2	KIMBE 100.3	LIHIR 100.3	MT. BOREGORO 107.7	MT. TURU 100.8	POPONDETTA 100.5	TELEFOMIN 100.3	WEWAK 100.8

LIVE GAME CALLS

Las sans bilong Vipers

Bustin Anzu i raitim

OL MANGI Mosbi i gat las sans long stap insait long 2013 Digicel Kap. Na dispela semi fainel egensim ol mangi bilong Yauro kantri bai ino isi.

Bihain long kam bek long dispela pilai resis aninit long Digicel Kap, Pot Mosbi Vipers i pilai gut tru long stat bilong sisen kam long arere bilong pilai. Planti nupela pes long pilai na manesmen tu i helpim ol kamap long dispela mak.

Nau, dispela semi fainel namel long ol na sempian tim Agmark Rabaul Gurias bai igo daun long waia, long wanem

tupela i gat ol gutpela pilaia long pilai insait long fainel.

Wanpela samting ol pilaia na manesmen bilong Vipers inap long amamas em long strongpela sapot bilong sponsa, Stop N Shop long stap wantaim ol na stap insait long fainel.

Taim ol siti mangi i tingim ol gem plen na stail bilong pilai, ol Gurias em ol papa bilong fainel. Ol i save soim pes long olgeta fainel pilai na dispela fainel em i no wanpela bikpela samting long ol.

Vipers i bin stap insait long ol sampela priliminari fainel i go pinis, tasol i no olsem fainel bilong 2013 na dispela bai

strongpela fainel stret.

Gurias i bin holim dispela Kap long las yia na dispela yia, em i no nupela long ol.

Vipers i winim Enga Mioks long Lloyd Robson Oval long las wiken long asples bilong ol. Tasol sapos ol i tingting tru tru long dispela fainel, ol mas pilai strong moa

Gurias i no mangi bilong ol. Ol i mas putim dispela tingting long baksait long het bilong ol.

Vipers i gat ol gutpela fowet na yangpela spit beklain tasol Gurias i gat spit, pawa na stail bilong pilai.

Fowet bilong tupela tim wantaim i wankain tasol ol beklain tasol bai winim pilai bi-

long tupela tim .

Larsen Marabe na Sebastian Pandia em tupela strongpela pilaia husat bai go pas long ensin rum bilong Vipers. Las wik, tupela i mekim bikpela hatwok stret na tupela bai wokim wankain long dispela wiken.

Rodney Pora na Kevin Frank bai mekim wankain long ol mangi bilong Ailan. Las wik long Goroka, tupela i soim olgeta masol bilong tupela tasol ol i lus long wanpela poin tasol long Bingtangor Goroka Lahanis.

Wina bilong dispela tupela gem bai bungim Lahanis long narapela wik antap.



Program bilong painim talen o save long spesel eria o "talent identification program (TIP)" em i wanem samting?

ASKIM inap givim yu planti as tingting na tu, ating yu wok long askim dispela program i bilong mekim wanem samting. Na moa yet, husat i ranim dispela program?

Dispela em i wanpela bikpela program bilong PNG Spots Faundesen. Program i tagetim ol lain insait long komyuniti husat i gat save, tasol ol i hait i stap.

Wanpela long ol komyuniti we dispela program i tagetim em ol skul we yu ken painim ol skul pikinini long ol wan wan krasmas level o grup.

Krasmas level we yu ken painim long ol skul i stap namel long 12 na 25. Ol i ken luksave long dispela grup na putim ol long ol trening kem we PNG Spots Faundesen i ogenaism.

Ol ektiviti o ol program ol i karimaut long TIP i gat long en kisim weit o hevi bilong ol, "height" o mak long longpela na putim ol long ol wan wan ektiviti olsem sindaun na go fowed, sam na go fowed na ran na tromoi.

Bihain long ol i glasim ol risal, ol i ken putim ol long ol wan wan spot ol bai mekim gut long ol. Piksa o eksampel em sapos ol i painim wanpela i gutpela long "long throw", dispela man o meri bai go long atletiks na em bai go insait long ol lain i lukautim dispela eria. Na ol narapela we ol i painim olsem risal bilong ol i gutpela, ol bai mekim wankain long ol.

Ol i ogenaism namba wan kem long stat bilong mun Septemba long dispela yia. Ol bai toksave long ol lain i kisim ol gutpela risal long go long kem we ol opisa bilong mipela bai karimaut long Mosbi na bihain, long Nesenel Spots Institut.

Dispela program bai go het na ol bai holim long ol rijenel level. Ol opisa bilong mipela long ol rijen bai karimaut ol wok long dispela program, na ol bai go long ol wan wan provins long ol rijen bilong ol. Ol opisa bai gat ol ikwipmen o ol samting bilong helpim ol i karimaut TIP.

Ol no inap long karimaut dispela program ol yet, nogat. Ol ki patna bilong mipela olsem Nesenel Federesen bai stap insait long dispela program.

Risal bilong dispela program em ol bai givim ol prodak i go long Nesenel Federesen long givim ol moa treninbg na ol bai kamap ol sta, o ol top pilaia bilong mipela bilong bihain taim.

Bai TIP i no lukluk long painim ol nupela talen, tasol ol bai helpim Nesenel Federesen long testim ol atlit bilong ol long ol sampela protocol o rot longf bihainim bilong mekim samting we bai helpim ol long skelim ol eria ol i no strong tumas long em. Dispela em i wanpela long ol eria ol rijenel opisa bilong mipela bai wok long en.

Dispela eksasais bai bildim o kamapim gutpela wok patna na tu, strongim wok bung wantaim.

Long dispela taim, TIP grup bilong mipela i wok go kam long ol rijen. Nau ol i wok long Sentrel Provins, tasol long ol mun i kam, ol bai mov i go long ol narapela rijen.

Northern Zone sempiansip i kamap gut

DISPELA Nothern Zone sempiansip i bin kamap long Wau i bin kamap gutpela tru, Interim CEO bilong PNGRFL Brad Tassell husat stap tu long dispela taim i tok.

'Mista Brad Tassell i tok em i amamas long go long Wau, long wanem em i mama ples we ragbi lig i bin kamap long PNG. Ol lain i mekim kamap dispela pilai, em Northern Zone PNGRFL Dairekta Russ Kaupa husat i wok hat tru wantaim Wau na Lae Ragbi Lig. Pilai i bin ran gut tasol, no gat birua i

kamap planti stail ragbi i bin kamap long tupela de bilong sempiansip. Dispela gem i pulim planti lain manmeri i kam na pasin bilong pipel long Wau i nais tumas.

Em i tok tu olsem dispela i lukim bilip Ragbi lig i long ol eria we gutpela pilai bai i kamapim gutpela gem na we i seif long ol famili wantaim ol sapota i go lukim.

Ol tim i pilai long dispela sempiansip em; Lae City, Lae Country, Madang, Tumerijah, Bulolo 1, Bulolo 2, Wau na Kainantu. Gem namel long

Lae Country na Lae City i lukim Lae Country i winim ol wantaim wanpela trai long ful taim sko sanap olsem 10-8.

Madang i pait hat tasol Lae City we i winim ol. Wankain taim tu long pinis bilong dispela gem, Mariannahill na Wau skul i pilai long amamasim ol sapota.

Nesenel Sempiansip bai i kisim 20 pilaia long makim Northern Zone long 14 i go inap long 16 Septemba long Lae. Ol selekta bai toksave long wik i kam. Nesenel selekta Steve Malum i stap tu

long dispela taim long helpim long selektim ol pilaia. Dairekta bilong Northern Zone PNGRFL Russ Kaupa i tok olsem PNGRFL i wok hat long kisim gem i kam bek gen long gutpela rot.

Em i tok, PNGRFL i bin kisim gem i kam bek long ol manmeri olsem bipo gem i kamap long Kwikila (Southern) na Wau. PNGRFL i givim K25, 000 long wanwan as ples o zone long helpim ol long redi na mekim ol tim husat bai go pilai bilong ol Nesenel sempiansip.



KISIM OL BOTOL: Ol wok man na sukiriti bilong PRL i rausim ol botol ol sapota bilong Mioks i tromoi go insait long pilai graun long las wik Sande. Dispela pilai bilong ol namel long Vipers i bin stop tripela taim olgeta. Ol sapota bilong Mioks i nau i gat nem nogut long ragbi lig na Digicel kap. **Poto Nicky Bernard.**

i kam long bek pes

Pom Vipers o Rabaul Gurias

Vipers i gat olgeta gutpela pilaia i stap long tim bilong ol. Sapos ol bihainim toktok bilong kosa bilong ol, bai ol i winim dispela gem wantaim sapot bilong ol sapota bilong ol.

Dispela pilai long

PRL long Sande bai wanpela gutpela pilai, na tu, bai no gat trabel long wanem tupela tim wantaim save pilai gut na ol sapota bilong save i ol tu save wanbel long ol disisen bilong referi.



Moa oil na meat insait

TUNA IN OIL

INSAIT:



Dro na poms lata

Pes 26

Ol spotpoto na Digicel Kap dro

Pes 25

Redi long wokabaut

Pes 24

Vipers o Gurias?

Nicky Bernard i raitim

DISPELA Wiken bai du o dai gem i kamap namel long Pot Mosbi Stop N Shop Vipers na Rabaul Admark Gurias long Mosbi.

Dispela tupela tim bin pilai wantaim long wiken go pinis we, Rabaul Gurias bin win na flai go antap long Goroka na pilai wantaim maina primia Goroka Lahanis. Gurias bin i lus long wanpela poin 15-14.

Vipers kam bek long hom graun bilong ol na winim pilai bilong ol wantaim ol Mioks. Dispela pilai bin stop tripela taim olgeta long wanem ol sapota bilong Mioks bin tro-moi ol botol na ston go insait long pilai graun na tu, wantaim ol lains man. Vipers i


winim dispela pilai 28- 16.

Long dispela wiken Gurias bai kam long hom graun bilong Vipers. Wanpela wik go pinis Vipers go pilai long hom graun bilong Guria we ol Viper i bin lus long bikpela skoa lain.

Dispela wiken Vipers bai soim strong bilong ol long hom graun long bekim dinau ol kisim long Rabaul. Vipers tu i save gut tru nau long pilai bilong Gurias na gem plen bilong ol bai senis long dispela wiken.

Gurias bin winim olgeta pilai bilong ol wantaim Vipers long dispela yia Digicel Kap. Na bai ol i tingting long pilai long holim yet kap long dispela yia gen sapos ol winim Vipers na go bungim gen Lahanis long gren fainel.

Moa long Pes 27.



ISRAEL ELIAB:
Man bilong stretim pilai bilong Vipers

Johnston's Pharmacies



All Sports and First Aid requirements



For First Aid Kits. Remington Hair Clippers, Remington Hair Appliances, Varta Batteries

P.O. Box 1066 Boroko
 Phone: 325 3185, Fax: 325 0190
 Email: sales@johnstons.com.pg